



السيرة النبوية

بشرح المهندس علاء حامد

(المستوى الثاني)

المحاضرة
الواحدة والثلاثون

المهمة المستحيلة حمراء الأسد

الحمد لله وأشهد أن لا إله إلا الله وحده لا شريك له وأشهد أن محمدًا عبده ورسوله ﷺ.

أما بعد ،،

أهلاً ومرحباً بكم في **اللقاء الواحد والثلاثين** من لقاءات هذه السيرة الطيبة المباركة على صاحبها أفضل الصلاة وأتم التسليم .

المرّة الماضية أنتهينا بفضل الله سبحانه وتعالى من الكلام عن **غزوة أحد** بتمامها وكما لها بفضل الله سبحانه وتعالى وأنتهينا إلى تلك الحالة الإيمانية التي أنتهى إليها رسول الله صلى الله عليه وسلم وهي كمال رضاه عن الله سبحانه وتعالى وكيف أن النبي عليه الصلاة والسلام رأى فيما حصل الحكم الباهرة التي سننكلم عنها و فعلاً رأى حكمة الله فيما جرى ، وأن هذه سنن تمضي وأن هذا من رحمة الله تعالى أنه كان لابد من عتاب من الله على ما حصل وإلا خلاص لن يتعلم الناس أي درس ولن يستفيدوا أي استفادة . عشان كده تلاقي بعد أحد محصلش موضوع ثاني خلاص الموضوع انتهى كله بعد كده إنتصارات بس مفيش هزائم ثاني إن هم أتعلموا الدرس إلا يوم حنين كان في الأول هيجصل حاجة كده وأتلحقت بسرعة كمان خلاص بقى بعد ما حصل في أحد اللي أتعلمناه في أحد يخلينا نتظبط بقية حياتنا .

لذلك النبي عليه الصلاة والسلام شوفنا في آخر مشهد في المرة الماضية أنه جمع الصحابة حتى أثنى على ربه يعني شكره وحمده على ما حصل لأنه له المحامد سبحانه وتعالى فيما حصل يحمد على ما حصل إن اللي حصل ده زي ما هنشوف كده فيه فوائد جمة وحكم باهرة في هذه الغزوة الخسائر اللي حصلت والجولة اللي كانت على المؤمنين دي كانت مفيدة جداً جداً كما سنرى وأزاي إن القرآن أصلاً ركز على الموضوع ده .

فالنبي عليه الصلاة والسلام جمع الصحابة وأثنى على الله تعالى وهو يقول **(إستووا حتى أثنى على ربي)** في عز ما في إصابات وحمزة مات ومصعب مات وعبدالله ابن جحش مات الأكابر من الصحابة ومن الأنصار .

أنتم عارفين الغزوة دي مات فيها كم واحد؟ سبعين من الصحابة رضي الله عنهم مقتلة رهيبة لم تحصل من قبل يعني لأول مرة يقتل هذا العدد في مرة واحدة

سبعين من الصحابة يقتلوا والعجيب يعني السبعين دول كان فيهم عارفين كم أنصاري ف السبعين دول أربعة وستين من الأنصار وستة من المهاجرين
عشان تعرف قد أيه الأنصار دول رجالة فعلاً ، فعلاً صدقوا مع النبي عليه الصلاة والسلام وفعلاً ماتوا يعني ما قصروا في شيء شوف قتلاهم عاملين أزاى في أحد يدل إن عددهم كان كبير أصلاً طبعاً في الغزوة كبير جداً أكبر من المهاجرين طبعاً وإن هم بذلوا مجهود رهيب جداً جداً لدرجة إن هم يعني قتل منهم أكثر بكثير من اللي قتل من المهاجرين أربعة وستين واحد من الأنصار ستة من المهاجرين طبعاً المهاجرين كان فيهم مصعب ابن عمير وكان فيهم على رأسهم حمزة وعبدالله بن جحش وثلاثة آخرون .

الشاهد يعني إن رغم الألم الرهيب ده ورغم الجراح الرهيبة دي إلا أن النبي عليه الصلاة والسلام رأى في ذلك من حكم الله تعالى ما يستحق أن يثني به على الله تعالى فجمع الصحابة وقال هذه الكلمات المؤثرة التي ختمنا بها المرة الماضية قال: (اللهم لك الحمد اللهم لا قابض لما بسطت ولا باسط لما قبضت ولا هادي لمن أضللت ولا مضل لمن هديت ولا معطي لما منعت) يعني خلاص اللي حصل حصل ولن يتغير ولن يتبدل ولا داعي لكلمة لو (ولا مانع لما أعطيت ولا مقرب لما باعدت ولا مبعد لما قربت اللهم أبسط علينا بركاتك ورحماتك وفضلك ورزقك اللهم أني أسألك النعيم المقيم الذي لا يحول ولا يزول)

العبرة في النهاية اللي يحصل يحصل في الدنيا بس تبقى أنت راضي عني ، ، نفس الكلام نفس المعنى اللي قاله بعد الطائف ، فاكرين لما قال: (إن لم يكن بك غضب علي فلا أبالي ولكن عافيتك هي أوسع لي أعوذ بنور وجهك الذي أشرقت عليه الظلمات وصلاح عليه أمر الدنيا والآخرة أن ينزل بي غضبك أو يحل علي سخطك)

هي دي أهم حاجة اللي يحصل يحصل أنا عارف ده عتاب بس ماينتهيش في الآخر إن أنت ساخط علي هو مؤمر يتحول إن أنا أخش النار اللي يحصل في الدنيا يبقى عتاب ونتعلم منه وفعلاً الموضوع كان عتاب بس بدليل إن ربنا ذكر في القرآن مرتين في سورة آل عمران أنه عفا عنهم تمام:

{ وَلَقَدْ صَدَقَكُمُ اللَّهُ وَعْدَهُ إِذْ تَحُسُّونَهُم بِإِذْنِهِ حَتَّى إِذَا فَشِلْتُمْ وَتَنَزَّعْتُمْ فِي الْأَمْرِ وَعَصَيْتُمْ مِمَّنْ بَعْدَ مَا أَرْسَلَكُمْ مَّا تُحِبُّونَ مِنْكُمْ مَّنْ يُرِيدُ الدُّنْيَا وَمِنْكُمْ مَّنْ

يُرِيدُ الْآخِرَةَ ثُمَّ صَرَفَكُمْ عَنْهُمْ لِيَبْتَلِيَكُمْ وَلَقَدْ عَفَا عَنْكُمْ وَاللَّهُ ذُو فَضْلٍ عَلَى
الْمُؤْمِنِينَ {

ده يأكد وبعد كده قال :

{إِنَّ الَّذِينَ تَوَلَّوْا مِنْكُمْ يَوْمَ الْتَقَى الْجَمْعَانِ إِنَّمَا اسْتَزَلَّهُمُ الشَّيْطَانُ بِبَعْضِ مَا
كَسَبُوا ۖ وَلَقَدْ عَفَا اللَّهُ عَنْهُمْ إِنَّ اللَّهَ غَفُورٌ حَلِيمٌ {

إذا هو كان عتاب هو ده اللي النبي عليه الصلاة والسلام بيطلبه من ربنا يا رب
يكون عتاب بس ميكونش غضب ميكونش ده بعديه سخط وبعديه بعد كده عذاب أو
بعد كده أنت ماشي لو جت على عتاب ولو جت على كده ونتعلم أحنأ راضيين يا
رب راضيين بقضائك وعارفين إن ده أكيد له حكمة فيقول **أسألك النعيم المقيم
الذي لا يحول ولا يزول وأسألك العون يوم العيلة** أهم حاجة لا تخذلني هناك هنا
في الدنيا لو غلط ولا حد غلط وأتعاتب خلاص لكن هناك ملهاش حل هذا يوم لا
ينفع نفسا إيمانها لم تكن آمنت من قبل قال **أسألك العون يوم العيلة والأمن يوم
الخوف** لما بتشوف الخوف اللي في الدنيا تقول أما الخوف في الآخرة عامل
أزاي؟ أمال في الآخرة هيبقى عامل أزاي؟! الناس إذ تصعدون ولا تلوون على
على أحد خافوا فعلاً الصحابة منهم اللي خاف الهجمة كانت شرسة من خالد تمام
فتخيل طب يوم من القيامة هروح فين لما خاف:

{يَقُولُ الْإِنْسَانُ يَوْمَئِذٍ أَتَيْنَ الْمَفْرُ (١٠) كَلَّا لَا وَزَرَ (١١) إِلَىٰ رَبِّكَ يَوْمَئِذٍ

الْمُسْتَقَرُّ (١٢) { [سُورَةُ الْقِيَامَةِ: ١٠-١٢]

فكل خوف في الدنيا بيفكرك بالخوف في الآخرة كل ما تخاف في الدنيا تقول يا
رب ما تخوفنيش في الآخرة لو خوفتني في الدنيا ما تخوفنيش في الآخرة لو
عاتبتني في الدنيا ما تعاتبنيش في الآخرة

فقولي اللهم أني أسألك الأمن يوم الخوف اللهم أني عائد بك من شر ما أعطيتنا
وشر ما منعتنا المنع فيه خير والعطاء فيه خير وممكن العطاء يبقى فيه شر والمنع
يبقى فيه شر فأنا مش فكرة ربنا بيعطيني ولا بيمنعني أهم حاجة أنه يدبر لي الخير
وده بيخليك بترضى بالمنع والعطاء بس أنا لو تمام مع ربنا ساعتها أحسن الظن
بالله في كل شيء إن أعطاني أحسنت الظن وإن منعني أحسنت الظن و على الدوام
أقول لعله خير يمكن ربنا بيدبر لي الخير بس أيه اللي يخليك دايمًا مطمئن إن أنت
ماشي صح هو أيه اللي بيخوف الإنسان؟

الانسان ما بيخافش من الحدث نفسه هو بيخاف من معصيته لما أنا أكون مش تمام مع ربنا بقلق من كل حاجة أنت أنا بقلق من الخير لو حصل إن ممكن يكون استدراج وممكن يكون ده عشان أستمر

{ فَلَمَّا نَسُوا مَا ذُكِّرُوا بِهِ فَتَحْنَا عَلَيْهِم أَبْوَابَ كُلِّ شَيْءٍ }

وسعنا عليهم في الخير ده أنت تقلق أحيانا من الخير نفسه مش تظمن ، أنت بتقلق من كل حاجة أنت مش قلقان من الحدث أنا طب أنا أصلا ماشي غلط اللي بيحصل ده خير ولا مش خير أنا غالب ظني إن أنا مثلي مايدبرلوش خير فبالتالي أنا الأول أظبط أموري مع ربنا أصلح حالي مع ربنا وبعد كده أحداث الدنيا يحصل اللي يحصل بقى أنا مش فارق معي لأن أنا أظن بالله أن أنا إن شاء الله يعني أكون أخذت بالأسباب اللي تخلي تدبير ربنا لي عشان الإنسان بيقول في الدعاء اللهم أعني ولا تعن علي إذا الأثنين ممكن تحصل وأنصرني ولا تنصر علي وأمكر لي ولا تمكر علي ، إذا كل الأثنين يحتمل ممكن نفس الحدث يبقى مكر لك أو عليك .

الجدار اللي بناه الخضر كان خير لناس وشر لناس خير للغلامين وشر لأهل القرية كسر السفينة كان خير مع أنه شكله العكس كان خير لأصحاب السفينة وشر للملك أنت بيتمكر لك ولا بيتمكر عليك ما هي دي الفكرة عشان كده أنت بتمشي أهم حاجة إن أنا أحقق القاعدة أيه هي القاعدة؟

إن أنت تكون مؤمن صالح بس وبعد كده تروح داخل أول ما تبقى مؤمن صالح تخش في الحديث عجا لأمر المؤمن إن أمره كله له خير إن أصابته سراء شكر فكان خيرا له وإن أصابته ضراء صبر فكان خيرا له وليس ذلك لأحد إلا للمؤمن

يبقى أنا أعمل حاجة أحقق الإيمان ، عقيدة سليمة ، عبادة سليمة إستقامة على أمر الله وبعد كده أحداث الحالة باستقبلها كلها بإنشراح صدر وراضي عن الله في كل أحوالي عشان كده ربنا بين إن حصل في قصة الخضر شر رهيب لكن بين إن ده كان تدبير لأصحابه قتل الغلام قال أما الغلام فكان أبواه أيه؟ محققين الشرط أهو مؤمنين فأحنا الغلام ده أتقتل عشان خاطرهم عشان أمكر لهم بدبر لهم بحميهم منه كان أبواه مؤمنين مع أنهم مطلبوش هو حدث بيحصل كده من غير ما تطلب وأنت مش لازم تطلب طالما أنت حققت الشرط أنا بدبر لك وبعثني بك تمام؟

{وَأَمَّا الْعُلَمَاءُ فَكَانَ أَبَوَاهُ مُؤْمِنَيْنِ فَخَشِينَا أَنْ يُرْهِقَهُمَا طُغْيَانًا وَكُفْرًا (٨٠)
فَأَرَدْنَا أَنْ يُبَدِّلَهُمَا رَبُّهُمَا خَيْرًا مِّنْهُ زَكَاةً وَأَقْرَبَ رُحْمًا (٨١)}

[سُورَةُ الْكَهْفِ: ٨٠-٨١]

فهنا طبعا هنا المشكلة إن اللي حصل فينا في معصية فعلاً وده اللي بيخلي الخوف ده مش الحدث اللي هو تقدر تقول زي مثلاً أيام مكة طب مثلاً أيام مكة كان في استضعاف وكان في تعذيب وبتاع بس مكنش في حاجة غلط حنا كنا صح فأنا راضي خلاص ده ربنا له حكمة إن الموضوع يطول بس المرة دي فيه غلطة ده الرعب بقى ما ربنا يفعل بما يشاء أنا راضي بس ميكونش أنا السبب في أن حصل لي شر تمام؟

فإذا أنا كنت تمام بعد كده تحصل أحداث الحياة أنا بقى في كل الأحوال أقول يا رب أجعله خير خلاص وأمشي بقى وخلاص انا بعمل اللي علي واللي يريد ربنا يكون فهنا النبي عليه الصلاة والسلام بيستعيز بالله إن أحنا نتعاقب فيقول " **أعوذ بك من شر ما أعطيتنا وشر ما منعتنا** " يا رب لما تدينا يبقى خير ولما تمنعنا يبقى خير ما تدينناش ويبقى شر وما تمنعناش ويبقى شر أهم حاجة فأنت بتقوض لله تماماً في العطاء والمنع تعطيني يا رب بتمنعني الأمر إليك يا صاحب الأمر تمام؟

عشان كده تلاقي أدعية النبي عليه الصلاة والسلام فيها تفويض دائماً وده نصيحة ما تقعدش تدقق قوي في التفاصيل فوض وخلاص **اللهم أني أسألك من الخير كله عاجله وآجله ما علمت منه وما لم أعلم** فيه مية حاجة بتحصل قدامك خير وأنت الحسابات بتقول شر بس هي خير معرفش يا رب أفوض لك بقى تمام؟

أصلح لي شأني كله ولا تكلني إلى نفسي طرفة عين أبداً وهكذا كان ده دعاء النبي عليه الصلاة والسلام هو دائماً يفوت حس عنده عبودية عجيبة النبي عليه الصلاة والسلام قال ويقول **اللهم حبب إلينا الإيمان يعني يا رب يصلح لنا الحال ما هو ده أهم حاجة لما تحبب إلينا الإيمان وزينه في قلوبنا وكره إلينا الكفر والفسوق والعصيان وأجعلنا من الراشدين**

أنا لو ظبطت دي أتظبطت معي انا خلاص كده تمام أي حاجة تحصل بقى أنا كده مش قلقان مش قلقان لأن أنا معنديش حاجة اتعاقب بها فيا رب وصلني للدرجة دي إن أنا أكون مؤمن صالح مستقيم وبعد كده أنا خلاص إن لم يكن بك غضب علي قاعدة تقول **أيه؟**

فلا أبالي خلاص ولكن طبعاً أكيد كل واحد فينا يحب العافية ولكن عافيتك هي أوسع لي أكيد يعني لو خيرت بين المرض والصحة الصحة أكيد يعني فقر والغنى أكيد الغنى أحسن بس ده يعني لو الأثنين حلوين يعني لو الأثنين خير أكيد أنا بحب العافية

لكن في الآخر لو واحد واحد لا أختار لي أنت بقى وقال: **اللهم توفانا مسلمين وأحيينا مسلمين وألحقنا بالصالحين غير خزايا ولا مفتونين**

وبعد كده دعا بقى على القوم الكافرين **اللهم قاتل الكفرة الذين يكذبون رسلك ويصدون عن سبيلك وأجعل عليهم رجزك وعذابك اللهم قاتل الكفرة الذين أوتوا الكتاب إله الحق** ، ده كان دعاء النبي عليه الصلاة والسلام النبي عليه الصلاة والسلام بعد ما خلص بقى كل حاجة راجع المدينة عليه الصلاة والسلام هنا حصل طبعاً مشاهد رائعة مبهرة جداً مشاهد الحب بقى حب عجيب من الصحابييات لرسول الله صلى الله عليه وسلم راجع المدينة بقى وطبعاً الأخبار وصلت خلاص المدينة قبل ما هو يوصل عليه الصلاة والسلام لأن في ناس أصلاً كانوا رجعوا المدينة قبل النبي عليه الصلاة والسلام ممن فروا وكده فرجع النبي عليه الصلاة والسلام المدينة في صحابييات من خوفهم على النبي عليه الصلاة والسلام طلّعوا يستقبلوه بيدوروا عليه بيشوفوا عايزين يتأكدوا إن هو عايش ولا ميت رغم إن هو وصل لهم ان هو لم يمت والصحابة وصل لهم كده بس لا أنا لازم أشوفه فمين الناس اللي أستقبلوه وهو راجع **حمنة بنت جحش** وأطمنت عليه الحمد لله بس حمنة بقى كان جاي لها أخبار صعبة جداً هي متعرفش لسه الأخبار حمنة بنت جحش دي يا جماعة جوزها **عبدالله** أخوها **عبدالله بن جحش** أخوها عبدالله ابن جحش **حمنة أخت زينب بنت جحش** لسه النبي حيتجوزها دي ما أتجوزهاش لسه هو لسه هيتزوج **زينب بنت جحش** فبرضوا حط زينب معك في الحسابات إن زينب مصابها هو مصاب حمنة لكن حمنة مصابها أكبر ليه؟ لأن حمنة وزينب أشتركوا في مصيبتين وحمنة تفوقت يعني زادت على زينب المصيبة أخطر بكثير ولا الأثنين مات لهم أخ وخال مين الأخ؟ **عبدالله بن جحش** وما أدراك ما عبدالله بن جحش يعني ده على مثل هذا فلتبكي البواكي يعني طب مين خالهم بقى؟ **حمزة** تخيل المصيبة

تخليهم حمزة لأن هي **زينب بنت صفية بنت أميمة** فهي بنت عمة النبي عليه الصلاة والسلام

عمته يبقى حمزة أخوها فحمزة بالنسبة لها خال فده ميت لها خالها وأي خال حمزة رضي الله عنه وأرضاه ميت لها أخوها عبدالله بن جحش هو من هو من أوائل من أسلم وميت حمزة فالأثنين أشاركوا في المصيبتين دول أخ وخال لكن حمنة بقي زادت مصيبة رهيبة لا تقارن بأي مصيبة هو الزوج ومين جوز حمنة؟
مصعب بن عمير تخيل بقي المرأة دي صبرت أزاي؟

لما واحدة يموت لها يا جدعان ده لو ماتوا من غير ما يكونوا قرايبها أنت بتسمع الثلاثة دول أصلا جنب بعض كده أنت بتتعب نفسيا تخيل لما يبقى واحد فيهم زوج وأخ وخال يعني المصاب هيبقى عامل أزاي؟

إذا كان أحنا بس بنسمع بعد ألف وأربعمائة سنة الخبر ده لسه الصدمة لغاية دلوقتي فما ظنكم صدمة حمنة وهي بتسمعه لأول مرة وهي بتتكلم في خال وأخ وزوج لدرجة إن دي أتقال لها قال لها استقبلته وسألت عن النبي عليه الصلاة والسلام وأطمنت فقال قيل لها مات أخوك فاسترجعت قالت **إنا لله وإنا إليه راجعون** صبرت وقال له مات خالك حمزة فصبرت فلما قيل لها مات مصعب والولد صوتت يعني ما أستحملتش والنبي عليه الصلاة والسلام طبعاً مشفق عليها الأخبار وراء بعض تخيل واحدة بتجي لنا الخبر ده أخوكي خالك جوزك وخالها بقي الخبر الأصعب في الآخر زوجك مات قال فصاحت صاحت صيحة صاحت ما أستحملتش النبي عليه الصلاة والسلام قال: **إن زوج المرأة منها بمكان** ، يعني الزوج حاجة تانية خالص بالنسبة للمرأة إذا كان المرأة فعلاً لها زوج صالح يرعاها ويوفر لها الحماية والأمان ويهتم بها والكلام ده مرأة له تقدير تاني خالص خالص عندها تمام؟

ففعلاً وفاة زوج صالح بالنسبة لامرأة هو يكاد يكون من أكبر المصائب على الإطلاق هي صاحت للنبي عليه الصلاة والسلام طيب خاطرها في بعض الروايات أن النبي صلى الله عليه وسلم سألها لما صحتي في ذلك؟ قالت ذكرت أبناء مصعب أنهم صاروا أيتام فأشفقت عليهم يعني عندنا أولاد وعندنا هيبقوا يتامى كلهم فبتقول ما أستحملتش مش أنا مش بس مشكلة فقدي أنا لسه هرعى ورائي أيتام فدعا لها النبي عليه الصلاة والسلام حمنة وزينب صبروا صبر رهيب بعد غزوة أحد .

امرأة ثانية جاءت للنبي عليه الصلاة والسلام دي بقى مصابها أكبر من حمنة أكبر من حمنة نتخيل وهي مش عارفين اسمها بيقال **امرأة من بني دينار** دي جاءت إلى النبي عليه الصلاة والسلام جاية تسأل عليه بس قالت طلعت قالت دلوني على رسول الله فقالوا لها طيب أستهدي بالله كده بس عايزين نقول لك حاجة قالت دلوني أين رسول الله صلى الله عليه وسلم أريد أن أراه فقالوا لها طب عندنا أخبار صعبة لك **مات أخوك** قالت **إنا لله وإنا إليه راجعون** دلوني على رسول الله ولا كأنها سمعت حاجة قالوا **مات أبوك** قالت **إنا لله وإنا إليه راجعون** أين رسول الله؟ دلوني عليه أين هو؟ ثم قالوا لها **مات زوجك** فحتى دي محستش بها يعني المرأة دي ولا صرخت ولا أي حاجة خالص واخدة ثلاث أخبار أصعب من بعض هنا مش خال ده أخ وأب وزوج يعني أصعب من موقف حمنة بكثير ورغم ذلك صبرت حتى الخبر الثالث هي مش حاسة بحاجة لغاية دلوقتي أشوف النبي الأول وبعد قالت دلوني على رسول الله صلى الله عليه وسلم فقالوا لا هو بخير قالت لا والله حتى أراه ما أناما سمعت إن هو بخير بس لازم أشوف بنفسى فخدوها فعلاً لغاية ما النبي عليه الصلاة والسلام لما رأته هديت خالص **قالت يا رسول الله كل مصيبة بعدك جلل** يعني صغيرة لا شيء قال طالما أنت بخير خلاص كل حاجة تهون يهون أبويا يموت أخويا يموت جوزي يموت المهم أنت بخير.

تخيل حب الصحابييات لرسول الله صلى الله عليه وسلم وده معنى :

{إِذْ تُصْعِدُونَ وَلَا تَلُونِ عَلَى أَحَدٍ وَالرَّسُولُ يَدْعُوكُمْ فِي أُخْرَاكُمْ فَأَتَابَكُمْ غَمًّا بِغَمٍّ لِّكَيْلًا تَحْزَنُوا عَلَى مَا فَاتَكُمْ وَلَا مَا أَصَابَكُمْ وَاللَّهُ خَبِيرٌ بِمَا تَعْمَلُونَ } [سُورَةُ آلِ عِمْرَانَ: ١٥٣]

فلا شك إن أكبر مصاب ممكن يتصوروا الإنسان هو موت النبي عليه الصلاة والسلام لذلك هو حتى النبي عليه الصلاة والسلام قبل ما يموت أو في بعض الأحاديث قال : **من أصيب بمصاب فليذكر مصابه بي** ، يعني بعد ما أموت خلوا موتي دايم هو اللي يفكر إن مفيش خلاص يعني مهما كانت مصيبتك هتكون بعد موت النبي عليه الصلاة والسلام فلا شك إن لا يوجد مصيبة في التاريخ وقعت بالمسلمين أعظم من مصابهم في رسول الله صلى الله عليه وسلم فهذه المرأة تخيل بقى لما تكون دي أكبر مصيبة في التاريخ وتختفي من قدامك مرة واحدة خلاص مثلاً أنا قلت لكم المرة اللي فاتت تخيلوا واحد أنقال له مثلاً حصل حريقة في

الشارع عندك بيتك ولع وعيالك مراتك أتحرقوا في البيت والشقة ولعت طبعاً تخيل هو رايح عامل أزاى فوصل هناك لقي إن الراجل مكنش عارف وبتاع طلع إن عياله نجوا ومراته نجت بس الشقة أتحترقت هيزعل على الشقة خلاص ده أول ما يشوف عياله هيقعد يبوس فيهم ويحمد ربنا ويسجد شكر وينسى موضوع الشقة يقول لك في داهية الشقة الحمد لله المهم العيال بخير لكن لو كان جاله خبر لوحده كان هيفضل زعلان على طول صح؟

كذلك دي جالها خبر أبوك أخوك بتاع والرسول فيه احتمال مات طب أشوفه الأول طلع إن هو لم يمت خلاص هانت بقى كل حاجة هانت بعد رسول الله صلى الله عليه وسلم **سعد ابن معاذ** أمه أم سعد ابن معاذ عائشة في الغزوة دي مات عمرو ابن معاذ أخو سعد ابن معاذ تخيل بقى سعد ابن معاذ أصلاً عامل أزاى تخيل عمرو ابن معاذ يعني أخو سعد ابن معاذ يعني مش محتاج تعريف يعني حاجة أكيد فخمة جداً زي سعد وحاجة تربية نفس تربية سعد

أم سعد بقى جاية تخيلوا أم **سعد ابن معاذ** بقى هتبقى عاملة أزاى دايماً لما بنذكر شخص بنقول هو مين أمه؟ يعني الأم اللي ربت سعد ابن معاذ جاية بقى أم سعد ابن معاذ دلوقتي جاية عشان تعرف مين أم سعد ابن معاذ بتسأل على **عمرو ابن معاذ** وعرفت إن عمرو مات عمرو ابن معاذ رضي الله عنه مات فقال النبي عليه الصلاة والسلام لما رآها طبعاً عارف إن أبنها ميت فعزاها قال لها كلام يطيب خاطرها قالت يا رسول الله أما إذ رأيتك سالماً فقد استشويت المصيبة يعني أستقلت المصيبة أنا أول ما شفتك خلاص نسيت عمرو نسيت أي حاجة المهم أنت بخير يا رسول الله طالما أنت بخير كل حاجة سهلة كل حاجة هينة ،

قالت أما وقدرك رسول الله فقد استشويت المصيبة يعني أستقلت المصيبة ثم قال لها أم سعد أبشري وبشري أهلهم أن قتلهم في قد ترافقوا في الجنة وأنهم قد شفّعوا جميعاً في أهلهم فقالت **رضينا يا رسول الله رضينا يا رسول الله** ولكن أدعوا لمن خلفهم أنا سايبة ناس والله لو وصلهم الخبر ما هيسحملوا أبداً الأخبار دي أسألها عشان شفتك بس مستحيلة وصابرة بس اللي هيسمع من ورايا وماشافكش كمان والله ما هيسحمل أبداً هو عمرو ابن معاذ شوية أخو سعد ابن معاذ فقال عليه الصلاة والسلام **"اللهم أذهب حزن قلوبهم وأجبر مصيبتهم وأحسن الخلف على من خلفوا اللهم أذهب حزن قلوبهم وأجبر مصيبتهم وأحسن الخلف على من خلفوا"**

ودخل النبي عليه الصلاة والسلام المدينة ودخل بيته يوم **سبعة شوال سنة ثلاثة من الهجرة** أحنا متفقين إن أحد كانت ثلاثة هجرية سبعة شوال سنة ثلاثة من الهجرة أنهى إلى المدينة عليه الصلاة والسلام وخلص قعد بقى وأستقر وطبعا إصابات رهبة في النبي عليه الصلاة والسلام لسه لغاية دلوقتي باين الجرح اللي في رأسه الوجنة الحلقين اللي دخلوا في خده باين أثارهم إلى الآن رباعية مكسورة مش قادر يحرك كتفه اليمين مش قادر يحركه أصلا بسبب الضربات اللي خدها على كتفه اليمين مصاب شديد جدًا طلع سيفه وأداه لفاطمة عشان تغسله مليء بالدم طبعا وقال لفاطمة أغسلي الدم عن هذا السيف فوالله لقد صدقني اليوم يعني أبلى معي بلاء حسنا هذا السيف تمام؟

أنظر إلى وفاء النبي عليه الصلاة والسلام حتى للجملات يعني هذا خلق عجيب جدًا يعني النبي عليه الصلاة والسلام بيشكر في سيف بيقول يعني ده السيف ده عمل معي يعني لا صدق معي بيتكلم مع سيف تخيل وفاة أمال بقى مع الناس هيعمل أيه؟ عليه الصلاة والسلام هنشوف دلوقتي هيعمل أيه مع الناس وأفكر كلمة وفائه حتى مع الجملات يعني لو ولو بيشكر جماد **جبل أحد** جبل يحبنا ونحبه تمام؟!

فقال لقد صدقني اليوم علي ابن أبي طالب كان واقف زوج فاطمة واقف في المشهد وطلع سيفه برضو كان برضو علي ابن أبي طالب طبعا عمل شغل جامد جدًا فقال لفاطمة وأنت أيضا خذي أيضا سيفي فأغسلي عنه الدم فوالله لقد صدقني بيقول لي أنا برضو النهاردة عمل معي شغل جامد جدًا .

فالنبي عليه الصلاة والسلام بقى الكلمة دي قلت لكم هقولها لكم المرة اللي فاتت بس أيه ما جاش وقتها قال كلمة عظيمة في الموقف ده ألتفت إلى علي بن أبي طالب وكأنه في درجة من التربية برضوا يعني زي ما عليه مش أنت لوحدهك يعني خلي بالك عشان برضوا أيه حنة تربوية برضوا حماه بقى فاهم قال: **يا علي لأن صدقك سيفك اليوم فلقد صدق معك اليوم سهل بن حنيف وأبي دجانة الله أكبر الله أكبر**

هو أنت مكنتش سرحان عن أبي دجانة طول الغزوة؟ نعم أنت أراي كده أنت بتابعهم أراي؟ يعني أنت أراي في الغزو واخذ بالك من سهل ابن حنيف؟ وواخذ بالك من أبي دجان ؟

يعني النبي عليه الصلاة والسلام خذ ده قاعدة بقى وأحنا ماشيين في السيرة كده رجل عجيب في متابعة الناس لا يشغله أبدًا شيء عن متابعي وهو قاعد في الغار ويقول أبحثوا عن **سعد ابن الربيع** حس في حاجة

فأين **جليبيب** في غزوة تبوك فيها ثلاثين ألف واحد يقول فين **كعب بن مالك**؟
طب تاخذ بالك أزاى؟ **ده من آثار رعاية الغنم**

فاكرين زمان وإن رعي الغنم له آثار كتير على الإنسان والطيبة والرحمة والصبر والكلام ده منها إدراك الشارد، إدراك الشارد يعني ميغبش عنه حاجة اللي بيرعى الغنم عينه تقعد طول النهار تلف دي بتجري هنا دي بتجري الغنم بالذات أصل الإبل والبقر ثابتين شوية الغنم لو الصغير بالذات تلاقيه جراية ولازم طول النهار تقعد تعدهم وتشوف مين اللي شردت وتجيبيها فهو متعلم من زمان عينه ما بتغفلش حتى مهما كان مشغول يعرف ده راح هنا وده راح هنا وده بيضيق فعلى طول واخذ باله في أي معركة **سهل ابن حنيف** عمليه عنده ومثال كل حاجة **أبا دجانة** عمل أيه من أول المعركة لأخرها رغم إن أبي دجانة كان فاكرين لما قال لكعب ابن مالك قل للنبي عليه الصلاة والسلام إنك شفتني في آخر معركة أنت مش محتاج تقول له هو أصلا واخذ باله هو كعب مقالوش هو النبي واخذ باله من غير حاجة عليه الصلاة والسلام قال له لأ أنت لو يا علي ابن أبي طالب سيفك صدق معك ففي اثنين كمان أنا أشهد لهم بالصدق الرهيب في المعركة سهل ابن حنيف وأبو دجانة رضي الله عنهم أجمعين الشاهد يعني إن الغزوة أنتهت بهذه الصورة و نزلت بقى القرآن شوف بقى كيف القرآن عرض الغزوة عشان تفهم طريقة القرآن فاكرين لما خدنا **غزوة بدر** وأتكلمنا عن **سورة الأنفال** وأكتشفنا سورة الأنفال بتتكلم في حاجة تانية غير الأحداث اللي كانت هي الظاهرة في الغزوة

✓ بتتكلم في القلوب في النوايا

✓ وبتكلم في الثمرات

✓ وتتكلم في أعمال قلبية

بتتكلم في بعد ثاني زي ما قلنا كده القرآن بالظبط عامل زي أنت بتعمل أشعة على جسمك كده أنا اللي شايفه جلد ولحم وبتاع ده اللي في السيرة ده اللي بنشوفه في كتب السيرة لكن القرآن بيعمل سكان تاني خالص شف بقى اللي جوة بقى الأعصاب والقلب فاهم أزاى ؟ والدم يعني و حاجات تانية خالص بتجيب أشعة

كده زي ما تشوف عضمك ولا تشوف مثلا أوعيتك الدموية هو القرآن بيحيب كده
يحب حاجة أنت ما بتشوفهاش في كده ما تتقالش غير في القرآن بس القرآن
بيركز على المشاهد دي وده يدل على إن المقصود السرائر :

{ يَوْمَ تُبْلَى السَّرَائِرُ (٩) فَمَا لَهُ مِنْ قُوَّةٍ وَلَا نَاصِرٍ (١٠) }

[سُورَةُ الطَّارِقِ: ٩-١٠]

{ وَلَيَبْتَلِيَ اللَّهُ مَا فِي صُدُورِكُمْ وَلِيُمَحِّصَ مَا فِي قُلُوبِكُمْ وَاللَّهُ عَلِيمٌ بِذَاتِ

الصُّدُورِ }

[سُورَةُ آلِ عِمْرَانَ: ١٥٤]

تلاقي القرآن بيتكلم في زاوية ثانية خالص بس خصوصا بعد ما حصل الموضوع
ده نزل القرآن بخطاب عجيب خطاب كله مواساة يعني العتاب كان محدود خد
بالك لو هتلاحظ العتاب كان محدود وفيه عفو كثير وفيه مواساة وده تستغربه
تستغربوا يعني ربنا عاتبهم قال {وَعَصَيْتُمْ} بس ده العتاب {وَعَصَيْتُمْ مِّنْ بَعْدِ
مَا أَرَاكُمْ} أيه؟ {مَا تُحِبُّونَ} مِنْكُمْ مَّنْ يُرِيدُ الدُّنْيَا وَمِنْكُمْ مَّنْ يُرِيدُ الْآخِرَةَ {
وبعد كده عفا عنهم وذكر أنه عفا عنهم

{ وَلَا تَهْنُوا وَلَا تَحْزَنُوا وَأَنْتُمْ الْأَعْلَوْنَ إِنْ كُنْتُمْ مُّؤْمِنِينَ (١٣٩) إِنْ يَمَسُّكُمْ
قَرْحٌ فَقَدْ مَسَّ الْقَوْمَ قَرْحٌ مِّثْلُهُ وَتِلْكَ الْأَيَّامُ نُدَاوِلُهَا بَيْنَ النَّاسِ وَلِيَعْلَمَ اللَّهُ
الَّذِينَ ءَامَنُوا وَيَتَّخِذَ مِنْكُمْ شُهَدَاءَ وَاللَّهُ لَا يُحِبُّ الظَّالِمِينَ (١٤٠) }

[سُورَةُ آلِ عِمْرَانَ: ١٣٩-١٤٠]

في بدر أنتم قتلتم سبعين تمام ؟ بل أنتم قتلتم سبعين وأسرتم سبعين أنتم ناسيين في
بدر عملتم فيهم أيه؟ وتلك الأيام نداولها بين الناس يوم لك ويوم عليك ليه يا رب
في يوم عليا؟ لحكم كثير منها طبعاً أصلاً أنتم عصيتم يعني ده برضوا لازم تحط
تحتها ألف خط ده منك أنت وزى ما ربنا قال قل هو من عند أيه؟ أنفسكم إن الله
على كل شيء قدير ممكن المعركة تخلص على غير كده بس هو أنت اللي عملت
في نفسك كده

{ إِنْ يَمَسُّكُمْ قَرْحٌ فَقَدْ مَسَّ الْقَوْمَ قَرْحٌ مِّثْلُهُ وَتِلْكَ الْأَيَّامُ نُدَاوِلُهَا بَيْنَ
النَّاسِ وَلِيَعْلَمَ اللَّهُ الَّذِينَ ءَامَنُوا وَيَتَّخِذَ مِنْكُمْ شُهَدَاءَ وَاللَّهُ لَا يُحِبُّ الظَّالِمِينَ }

[سُورَةُ آلِ عِمْرَانَ: ١٤٠]

بس برضوا فيه فوايد تانية حصلت للموضوع قال سبحانه :
{ إِن يَمَسَّ سَكْمٌ قَرَحٌ فَقَدْ مَسَّ الْقَوْمَ قَرَحٌ مِّثْلُهُ وَتِلْكَ الْآيَاتُ نُدَاوِلُهَا بَيْنَ
النَّاسِ وَلِيَعْلَمَ اللَّهُ الَّذِينَ ءَامَنُوا وَيَتَّخِذَ مِنْكُمْ شُهَدَاءَ وَاللَّهُ لَا يُحِبُّ الظَّالِمِينَ }
[سُورَةُ آلِ عِمْرَانَ: ١٤٠]

فهنا بقى تبتيدي الآيات من أول هنا وأنت طالع بقى بتسرد الحكم البالغة فيما حصل
في يوم أحد، منها إن ربنا قدر اللي حصل ده عشان يحصل مداولة ما ييقاش
النصر دايمًا للمؤمنين بل يحصل مرة للكافرين ولو نصر محدود زي اللي حصل
في يوم أحد علشان يحصل الآتي واحد ليعلم الله الذين آمنوا حيبان بقى المؤمن من
المنافق وده بان على طول جدًا

{ وَلِيُمَحِّصَ اللَّهُ الَّذِينَ ءَامَنُوا وَيَمْحَقَ الْكَافِرِينَ }
[سُورَةُ آلِ عِمْرَانَ: ١٤١]

فمن حكم الله تعالى أن يحصل المفاصلة دي زي ما شوفنا **عبدالله بن أبي بن سلول**
أزاي أنشق وأزاي في ناس طلوعوا معه لولا إن كان حصل كده وبعد الغزو هيبان
أكثر بقى النفاق هيبان أكثر في المدينة كل واحد هيتجرأ على المؤمنين بان بقى
مين المؤمنين المشاهد الرائعة لعبدالله بن جحش لطلحة بن عبيد الله أبا طلحة
الأنصار سعد ابن أبي وقاص أبا عبيدة ابن الجراح كل ده كان هيبان أمتى إلا في
عز محنة زي دي وأزمة زي دي الناس اللي صدقوا مع النبي عليه الصلاة
والسلام ليعلم الله الذين آمنوا .

خد بقى نفس الكلام ده وأنا بقوله كده حط بقى قدامك غرة تحط قدامك أي بلد فيه
آلام للمسلمين نفس الحكم تتكرر في كل زمان ومكان ونبدأ من نفس النقطة ولا
تحزنوا وأنتم الأعلون أنت دايمًا عال على الكافر حتى لو أنت مستضعف بس أنت
عالي بالحجة عالي بالإيمان لابد أن تشعر بحالة الاستعلاء دي دايمًا على الكافر
بإيمانك بقوة عقيدتك بأن أنت صاحب حجة دائمًا وهو دائمًا ضعيف ليس له إلا
القوة والغشومية والسخرية والبطش والقتل وده يدل على ضعف حجته لو كان
يقدر يهزمك في ميدان الحجة محتاج كان وفر فلوسه ولم يحتاج لكل البهذلة دي
تمام وأنت مش محتاج أكثر من مناظرة عشان تنتهي المسألة معكم أنتم الأعلون كما
قال تعالى لما موسى عليه السلام أوجز في نفسه موسى :

{ قُلْنَا لَا تَخَفْ إِنَّكَ أَنْتَ الْأَعْلَىٰ (٦٨) وَأَلْقِ مَا فِي يَمِينِكَ تَلَقَّفَ مَا صَنَعُوا^ط
إِنَّمَا صَنَعُوا كَيْدُ سَاحِرٍ وَلَا يُفْلِحُ السَّاحِرُ حَيْثُ أَتَىٰ (٦٩) }
[سُورَةُ طه: ٦٨-٦٩]

فالشاهد نفس الكلام هنا أنتم الأعلون دائماً مهما حصل مهما كان الوضع في غزة
مهما كان الوضع المسلمين نحن دائماً أهل الإسلام نحن الأعلون حتى وأحنا
مستضعفين نحن الأعلى دائماً الأعلى بالإيمان كلمة الذين كفروا السفلى دي أتقالت
والنبي في الغار وهم فوقيه وكلمة الله دائماً هي العليا والله عزيز حكيم طب اللي
بيحصل ده يا رب ليه! ده اللي هيجنن الناس يا رب ليه بيحصل فينا كده؟

طبعاً مش عايزة كلام إن اللي بيحصل فينا ده سببه مش مش هقول لك معصية بقي
ده فجور وكبائر وشركيات يا جماعة الأمة دب فيها الشركيات ملهاش حصر ده
أحنا بنتكلم هنا عصيتهم يعني نزلوا من على جبل الرماة بس أحنا بنتكلم في أمة فيها
سحر رهيب سحر اللي هو كفر يعني في كل بلاد الصحي فيها شرك شركيات
سجود لقبور ونزول لقبور ودعاء موتى وبتاع واعتقاد في أبراج واعتقاد في
الغيب طبعاً أنت بتشوف كفر أكبر تمام فحاجة مهولة ده غير طبعاً الربا الزنا
الشذوذ في بلاد المسلمين وصل لأيه؟ الدعارة وصلت لأيه في بلاد المسلمين؟
موالاة الكافرين الحكم بغير ما أنزل الله أنت متخيل أمة فيها كل ده!
ده أنت بتقول ده كده رحمة ده لما حصل في أحد بسبب كم واحد نزلوا من على
جبل كل ده حصل أومال لو مجموع بقى معاصي الأمة اللي دلوقتي المفروض
يحصل فينا أيه؟ ده أنت تقول ده ربنا راحنا

{ وَلَوْ يُؤَاخِذُ اللَّهُ النَّاسَ بِظُلْمِهِمْ مَا تَرَكَ عَلَيْهَا مِنْ دَابَّةٍ وَلَٰكِنْ يُؤَخِّرُهُمْ
إِلَىٰ أَجَلٍ مُّسَمًّى فَإِذَا جَاءَ أَجْلُهُمْ لَا يَسْتَحْضِرُونَ سَاعَةً وَلَا يَسْتَنْقِذُونَ }
[سُورَةُ النَّحْلِ: ٦١]

دا هي لو ماشية بالظبط ما أنت مش هتفضل فيها أصلاً فأنت كده مرحوم فأنت
أصلاً الأول نفسك أصلاً كل اللي بيحصل ده بسببنا كل هذا بسببنا بسبب معاصينا
وممكن تقول لي طب هم ذنبهم أيه؟

ما خد بالك ممكن أحنا كمجموع أمة ما هو معلش **هو النبي ذنبه أيه في المعصية؟**
مش هو اللي أتأذى في الآخر ما أنت مش لازم يتعاقب العاصي نفسه هو إيذاء
النبي عليه الصلاة والسلام ده مش ضرر مش أذى الناس كلها بس هو بالنسبة له هو

هتقول لي طب هو ذنبه أيه؟ طب هو خسر حاجة؟ مش موضوع أنقلب معه أجر وشرف الشهداء اللي ماتوا كانوا ذنبهم حاجة؟! كل اللي استشهدوا في المعركة مش هم اللي فروا أكيد مش هم اللي فروا اللي فروا ما استشهدش تمام؟ طب اللي مات مش هو اللي فر طب ذنبه أيه؟ هو اللي استشهد زعلان في حاجة؟ ده سألهم ربنا سألهم عايزين أيه؟ قالوا له رجعنا تاني عشان نموت تاني وتالت ورابع في سبيلك يبقى إذا لما تحصل مصيبة تقول لي مثلا **طب ما هي المعاصي في بلاد تانية ذنبهم أيه أهل غزة؟**

بالعكس هم بيتكافئوا وأحنا اللي بنتعاقب يعني هي معصية هو العقوبة أحنا أتعاقبا بهم عشان أحنا اللي بنبتلى في الآخر ربنا بيكتب عملنا مين متعاطف؟ مين نصر الأمة؟ مين بكى؟ مين دعا؟ هم بقى قاعدين ياخدوا الأجور بس بياخدوا الأجور والشهادة وبتاع وأنت اللي بتشيل غير معصيتك اللي أنت أصلا عاملها بتشيل بعد كده إبتلاءات بسبب إن أنت أبتليت بهم غير ألأما المستمرة والكلام ده فمسألة إن أحنا المصاب يبقى فربنا بيعامل الأمة كوحدة واحدة فممكن مصابه يبقى في حنة مش هي اه مش أكثر معاصي هنا لكن بنبتلى بهم تمام؟ فهنا بقى ربنا زي ما اللي يعلم الله الذين آمنوا اللي هو كلنا ما عدا غزة ويتخذ منكم شهداء هم بقى الشهداء هيبقوا هناك ربنا بيحب الشهداء ييجوا أراي؟ في عبادة ربنا بيحبها أسمها أن تموت في سبيل الله هتموت في سبيل الله أراي إن لم يكن في معركة مع الكفار فلا بد من معركة مع الكفار فلا بد في موت يبقى في احتمال إن أنت حصل خسارة أو فوز والكلام ده فإذا متوقع الأثنين وربنا يحب إن يرى ذلك يحب أن يرى الشهداء يحب أن يرى إن الوضع يكون صعب وناس تموت في سبيله وعادي فده كان لازم يحصل حاجة زي كده لأن هناك عبادات لا تكون إلا بالإبتلاء وده بيديك تفسير لماذا يحصل الإبتلاء عموما بغض النظر عن نوع الإبتلاء

من أسباب حصول الإبتلاء للمؤمن :

إن هناك عبادات يحبها لا تكون إلا في الإبتلاء :
« الصبر » التوكل « المسكنة » البكاء « التضرع » الإلحاح « حسن الظن بالله
« الثقة باليقين في الله هتحصل مش بتحصل في السراء دي ما تحصلش غير في الضراء .

فلأن ربنا يحب العبادات دي ويحب أن يراها من المؤمن يقدر عليه أنواع إبتلاءات حتى من غير معاصي ولا حاجة زي المعاصي الإبتلاءات اللي بتحصل للأنبياء وللصحابة والكلام ده بيحب يرى منهم ذلك وبيديهم أجر فهو مش خسران حاجة .

واحد قال لك مثلاً واحد عادي قال لك هقرصك قرصة واديك مليون جنيه قل له اقرصني معلش هوجعك مش مشكلة طالما أنا كسبان فمش هيفرق معك أنت لو هو مستحضر الأجر أنت كسبان مع ربنا فأنت مش متضايق من حاجة لأن فعلاً كل آلام الدنيا تعتبر قرصة بالنسبة للي هيحصل في الآخرة تمام؟

حديث أنس قال: قال رسول الله ﷺ: "يؤتى بأهل الدنيا من أهل النار يوم القيامة، فيصبغ في النار صبغةً، ثم يقال: يا ابن آدم هل رأيت خيراً قط؟ هل مر بك نعيم قط؟ فيقول: لا والله يا رب، ويؤتى بأشد الناس بؤساً في الدنيا من أهل الجنة، فيصبغ صبغةً في الجنة، فيقال له: يا ابن آدم هل رأيت بؤساً قط؟ هل مر بك شدة قط؟ فيقول: لا، والله ما مر بي بؤس قط، ولا رأيت شدة قط"

{ فَيَوْمَئِذٍ لَا يُعَذِّبُ عَذَابُهُ أَحَدٌ (٢٥) وَلَا يُوثِقُ وَثَاقُهُ أَحَدٌ (٢٦) }

[سُورَةُ الْفَجْرِ: ٢٥-٢٦]

يبقى دي أحد الحكم

{ إِنْ يَمْسَسْكُمْ قَرْحٌ فَقَدْ مَسَّ الْقَوْمَ قَرْحٌ مِثْلُهُ وَتِلْكَ الْأَيَّامُ نُدَاوِلُهَا بَيْنَ النَّاسِ وَلِيَعْلَمَ اللَّهُ الَّذِينَ ءَامَنُوا وَيَتَّخِذَ مِنْكُمْ شُهَدَاءَ وَاللَّهُ لَا يُحِبُّ الظَّالِمِينَ }

[سُورَةُ آلِ عِمْرَانَ: ١٤٠]

يعني محدش يفهم إن ربنا أذن بعلو الظالمين عشان بيحبهم أبداً ميجيش في دماغك كده ما هو بعض الشباب يجيلك يقول لك بص يا عم الكفار ما هو ده ربنا أكيد بيحبهم بص الدنيا اللي عندهم بص التقدم بص التكنولوجيا بص شوارعهم وشوارعنا تأكد إن كل ده بيحصل مش معناه إن ربنا بيحب الظالم هو ربنا قال ده إذا كان حصل في النبي كده عليه الصلاة والسلام على يد ظالمين وربنا بيقول أنا رغم اللي حصل ده أنا لا أحب الظالمين! لكن ده حصل لعل تانية بعد كده قال أيه والله لا يحب الظالمين وليمحص الله الذين آمنوا ويمحق الكافرين دي واضح جداً ويمحق الكافرين عشان تحقق كلمة الله على الكافرين أم حسبتم أن تدخلوا الجنة هي بالساهل كده مش لازم في اختبار .

ما هي لو الدنيا حلوة على طول ما كله هيخش المنافق هيبقى معاك لو الدنيا على طول لذينة مع المسلمين ودايما علو المؤمنين عاليين على الكافرين طب ما كله هيخش الإيمان نفاق وبكده كل واحد بيحي يوم القيامة أنا أقول أنا كنت مؤمن لا لازم إمتحانات تصفي كل فترة وليمحص الله الذين آمنوا ويمحق الكافرين عشان الكافر ميقولش يوم القيامة مكنتش هعمل حاجة في المؤمنين أنا مكنتش هعمل فيهم حاجة ربنا يخلي معه قوة ومعه بطش ويقدر على المؤمن فيقدر عليه ويؤذيه ويحق عليه كلمة الله سبحانه وتعالى ويظهر معدنه الخبيث لما توفرت الفرصة بان معدنه الخبيث لكن من غير الفرصة ممكن يقول لك أنا طيب جدًا عشان هو مستضعف زي مثلا المسلمين يبقوا أقوياء فتلاقي الكفار يكشوا وعازيزين التصالح وأحنا مسالمين وبتاع أول ما يتمكنوا من المسلمين يدبحوهم على طول فيأذن ربنا أحياناً في كده عشان يظهر المعدن الخبيث وعشان ما تصدقش الكافرين أبداً

{ أَمْ حَسِبْتُمْ أَنْ تَدْخُلُوا الْجَنَّةَ وَلَمَّا يَعْلَمِ اللَّهُ الَّذِينَ جَاهَدُوا مِنْكُمْ وَيَعْلَمَ الصَّابِرِينَ (١٤٢) وَلَقَدْ كُنْتُمْ تَمَنَّوْنَ الْمَوْتَ مِنْ قَبْلِ أَنْ تَلْقَوْهُ فَقَدْ رَأَيْتُمُوهُ وَأَنْتُمْ تَنْظُرُونَ (١٤٣) }

[سُورَةُ آلِ عِمْرَانَ: ١٤٢-١٤٣]

الكلام سهل مش الماية تكذب الغطاس قل زي ما أنت عايز بس هتيحي في الجد هيبان .

يقول لك بقى من الحكم الجميلة إن ربنا سبحانه وتعالى هيى الصحابة للمصيبة الأكبر وهي موت النبي عليه الصلاة والسلام فكان من الحكم المحموده في يوم أحد هو تهيئة الصحابة لموت النبي عليه الصلاة والسلام أنت عارف لو كانت حصلت مرة واحدة بس كانت هتبقى أصعب بكثير أنتم عارفين أيه اللي هون على أو أيه اللي خلى الصحابة يهدوا بعد موت النبي عليه الصلاة والسلام؟ الآية دي

{ وَمَا مُحَمَّدٌ إِلَّا رَسُولٌ قَدْ خَلَتْ مِنْ قَبْلِهِ الرُّسُلُ أَفَإِنْ مَاتَ أَوْ قُتِلَ انْقَلَبْتُمْ عَلَى أَعْقَابِكُمْ وَمَنْ يَنْقَلِبْ عَلَى عَقْبَيْهِ فَلَنْ يَضُرَّ اللَّهَ شَيْئًا وَسَيَجْزِي اللَّهُ الشَّاكِرِينَ (١٤٤) وَمَا كَانَ لِنَفْسٍ أَنْ تَمُوتَ إِلَّا بِإِذْنِ اللَّهِ كِتَابًا مُؤَجَّلًا وَمَنْ يُرِدْ ثَوَابَ الدُّنْيَا نُؤْتِهِ مِنْهَا وَمَنْ يُرِدْ ثَوَابَ الْآخِرَةِ نُؤْتِهِ مِنْهَا وَسَنَجْزِي الشَّاكِرِينَ (١٤٥) }

[سُورَةُ آلِ عِمْرَانَ: ١٤٤-١٤٥]

هو هيموت هيموت بس مش المرة دي ومن يرد ثواب الدنيا نؤته منه ومن يرد ثواب الآخرة نؤته منها وسنجزى الشاكرين .

الصحابه لما فعلاً مات النبي عليه الصلاة والسلام فقدوا صوابهم تماماً **عمر بن الخطاب** كان ماشي بيكلم نفسه وأي حد بيقول له النبي مات كان هيمسكه يضربه يقول له لم يمت والله ما مات ويحلف بالله ده راح للقاء ربه كما راح موسى للقاء ربه ورجع تاني عادي مفيش حاجة لغاية ما جه **أبأبكر الصديق** ودخل على النبي عليه الصلاة والسلام وراه خلاص مات فقبله وقال طبت حيا وميتا يا رسول الله وطلع بقى للصحابه ووقف لقي عمر كالثور الهائج تماماً هائج في الناس ومحدث عارف يوقفه فقال على رسلك يا عمر أهدأ يا عمر على رسلك يا عمر ثم قرأ قوله تعالى { وَمَا مُحَمَّدٌ إِلَّا رَسُولٌ } وكان بص العلة اللي من أجلها حصل الموضوع ده بتطبق عمليا ودي كانت الحكمة أحد الحكم أن تنهيا القلوب لليوم ده ففعلاً أبأبكر طلع مفيش زي أبأبكر يا جماعة لا في الفهم ولا في العلم أعلم واحد في الصحابة **أبأبكر الصديق** بس إنشغاله بالخلافة خلانا منه كثير زي ما خدنا من **ابن عباس** و**ابن عمر** والكلام ده بس لا شك إن أبأبكر هو أعلم الصحابة وأكثر واحد بيتدبر القرآن وكان بكاء رهيب شديد البكاء إذا قرأ القرآن بص استحضره للآيات بسرعة في موقف مهيب زي ده الواحد ينسى اسمه فيه يطلع بكل قوة وثبات وهو أكثر واحد حزين .

خد بالك هو في حد متألم زي أبو بكر الصديق في اليوم ده أيه الثبات ده؟! وأيه القوة دي يا جماعة عارفين أنتم دلوقتي بيتكلموا في **الثبات الإنفعالي والثبات العاطفي** يا جماعة أنت بتدرس أحوال الصحابة دي اختصار كل **كورسات الثبات الإنفعالي والثبات العاطفي** والكلام الكبير اللي أنت بتسمعه ده في أحوال النبي عليه الصلاة والسلام وأحوال الصحابة أزاى كانوا في مواقف رهيبه ويثبتوا ثبات غريب وكلام غريب يطلع في موقف في الواحد ينسى اسمه فيه يطلع يقولهم الصحابة بيقولوا كإننا لأول مرة نسمعها وكإننا ما سمعناها من قبل لقد قالها أبأبكر وكإننا أنزلت في وقتها أحنا كإننا الآية دي معدتش علينا قبل كده محدش فينا أفكرها قال حتى عدنا إلى بيوتنا ونحن نردد

{ وَمَا مُحَمَّدٌ إِلَّا رَسُولٌ قَدْ خَلَتْ مِنْ قَبْلِهِ الرُّسُلُ أَفَإِنْ مَاتَ أَوْ قُتِلَ أُنْقَلَبْتُمْ عَلَى أَعْقَابِكُمْ وَمَنْ يَنْقَلِبْ عَلَى عَقْبَيْهِ فَلَنْ يَضُرَّ اللَّهَ شَيْئاً وَسَيَجْزِي اللَّهُ }
أَعْقَابِكُمْ وَمَنْ يَنْقَلِبْ عَلَى عَقْبَيْهِ فَلَنْ يَضُرَّ اللَّهَ شَيْئاً وَسَيَجْزِي اللَّهُ

الشَّاكِرِينَ (١٤٤) وَمَا كَانَ لِنَفْسٍ أَنْ تَمُوتَ إِلَّا بِإِذْنِ اللَّهِ كِتَابًا مُؤَجَّلًا وَمَنْ يُرِدْ ثَوَابَ الدُّنْيَا نُؤْتِهِ مِنْهَا وَمَنْ يُرِدْ ثَوَابَ الْآخِرَةِ نُؤْتِهِ مِنْهَا وَسَنَجْزِي الشَّاكِرِينَ {

بقوا ماشيين يكلموا أنفسهم في الشارع بالآية دي أنظر إلى آية عملت أيه في الصحابة؟ فده بيديك تاني ليه ربنا قدر يوم أحد ده بالذات؟ عشان كان مطلوب تحصل إشاعة لموت النبي عليه الصلاة والسلام عشان تبقى بروفة زي ما بيقولوا كده هتعملوا أيه لو مات هتعملوا أيه لو مات؟ شوفتم حصل أيه فيكم لأ أنت كده خفيف لا اثبتوا شوية لأنه هيموت هتعملوا أيه بقي لما يموت بجد؟ !

فالمرة الثانية كانت أحسن حالا بكتير المرة الأولى الناس سابوا السلاح وقالوا أحنا بنعمل أيه بقي خلاص ملوش لازمة الحياة، كمل يا عم فكمّلوا بقي الصحابة المرة الثانية كانوا أحسن حالا بكتير.

أتعلموا الصحابة من أخطائهم أتعلموا أزاىي يعالجوا الأخطاء أتعلموا شؤم المعصية شؤم المعصية وخدوا درس عنيف في شؤم المعصية عرفوا خطورة إثارة الحياة الدنيا عشان كده الصحابة تلاقيهم زهدوا في الدنيا بعد كده بعد ما أتقال لهم الكلمة الصعبة دي منكم من يريد الدنيا بص ربنا من لطفه مقالش مسماش سابها كده كل واحد يشك في نفسه كله شك في نفسه يمكن أنا منكم من يريد الدنيا ومنكم من يريد الآخرة تمام؟

وأتسابت بقي كده كل واحد يأدب نفسه بنفسه يحط نفسه احتمال المقصود بالآية دي من ساعتها زهد الصحابة في الدنيا بأسرها ما عاد تفرق معهم أي حاجة المهم إن ربنا راضي وما كانوا يعني يعترضون على النبي عليه الصلاة والسلام في أي شيء بعد ذلك تمام؟

اه الكسرة اللي حصلت في يوم أحد اه بنقول إن هي من **حكمها إن هي بتمنع عن الإنسان طغيان العافية .**

أنتم عارفين دوام النصر ودوام العافية له طغيان لو الإنسان دامت عافيته ودوام نصره يصاب بالأنا شوية أو يصاب بالكبر أو يظن إن هو اللي بيعمل كده أو إن هو جامد فلازم واحدة كده عشان زي ما بيقول كده تعرف إن الله حق أو تعرف إن هي بربنا مش بيبك وتعرف إن أنت ما تستغناش عن ربنا ممكن واحد يعافى

فترة فيفتكر إن هو بسبب أنا جامد وصحتي وبتاع يصاب بمرض واحد ما شاء الله سابت على الطاعة بقى له فترة جه فترة كده شاف نفسه شوية أنا ملتزم أنا جامد بعد ما كان بيدعي وبتاع قلل الدعاء شوية وبدأت أنا جامد دي راح واقع في معصية غريبة عمره ما وقع فيها بقى له زمان وقع وقعة عيل ما يقعهاش واحد يعني شمال فاهم؟ أيه ده أزاى أنا وقعت الوقعة دي فيفهم بقى إن دي رسالة من ربنا على فكرة أنت بدأت تتعوج وبدأت تشوف نفسك تعال بقى يروح تاخذ واحدة كده تتعدل بقى واخذ بالك لأن دوام العافية و دوام الحال له طغيانه

{ كَلَّا إِنَّ الْإِنْسَانَ لِرَبِّهِ لَكَنَّا (٦) أَنْ رَأَاهُ اسْتَغْنَى (٧) }

[سُورَةُ الْعَلَقِ: ٦-٧]

فلازم واحدة كده فالكسرة دي كأنها بتعمل الفريش كده للحياة كلها نفوق بقى من الأول تاني كده ونرجع بقى أحسب حساباتك صح ونتظبط بقى من الأول تمام؟ عشان كده ربنا قال:

{ وَلَوْلَا دَفْعُ اللَّهِ النَّاسَ بَعْضَهُمْ بِبَعْضٍ لَفَسَدَتِ الْأَرْضُ وَلَكِنَّ اللَّهَ ذُو فَضْلٍ

عَلَى الْعَالَمِينَ }

[سُورَةُ الْبَقَرَةِ: ٢٥١]

لازم دفع عينية دفع يعني مرة معك ومرة معي إن يلعب مع واحد بس الدنيا تفسد سواء معك أو معي على فكرة يعني لو دامت مع الكافرين مش هيستحملوا في الآخر هينافقوا وهيكفروا ومحدث هيستحمل للآخر ربنا قال كده:

{ وَلَوْلَا أَنْ يَكُونَ النَّاسُ أُمَّةً وَاحِدَةً لَجَعَلْنَا لِمَنْ يَكْفُرُ بِالرَّحْمَنِ لِبُيُوتِهِمْ سُقْفًا مِّنْ فِضَّةٍ وَمَعَارِجَ عَلَيْهَا يَظْهَرُونَ (٣٣) وَلِبُيُوتِهِمْ أَبْوَابًا وَسُرُورًا عَلَيْهَا يُتَكَبَّرُونَ (٣٤) وَزُخْرَفًا وَإِنْ كُلُّ ذَلِكَ لَمَّا مَتْلَعِ الْحَيَاةِ الدُّنْيَا وَالْآخِرَةُ عِنْدَ

رَبِّكَ لِلْمُتَّقِينَ (٣٥) }

[سُورَةُ الزُّخْرَفِ: ٣٣-٣٥]

كان كل الناس هتكفر ولو دامت مع المؤمنين برضوا الدنيا هتفسد ليه؟ هيخش في المؤمنين من ليس منهم ويكثر النفاق والدنيا تبوظ برضوا فلازم شوية كده شوية كده فإذا إن هي بتروح شوية عند الكافرين ده شيء صحي للمؤمنين عشان بيتعافوا من كل الأمراض دي ويبصفوا وبيهذبوا وبينصفوا زي ما أنت كده بترج حاجة كده عشان تنزل الشوائب أنت كأنك بتضربها وبتخبطها بس الرجة دي أفيد

حاجة لها عشان هتصفي على الحاجة المفيدة في الآخر وزى ما قلنا واللي تحقق كلمة الله على الكافرين زي ما ربنا قال:

{ وَلَا يَحْسَبَنَّ الَّذِينَ كَفَرُوا أَنَّمَا نُمَلِّى لَهُمْ خَيْرٌ لِّأَنفُسِهِمْ إِنَّمَا نُمَلِّى لَهُمْ لِيَزْدَادُوا إِثْمًا وَلَهُمْ عَذَابٌ مُّهِينٌ (١٧٨) مَا كَانَ اللَّهُ لِيَذَرَ الْمُؤْمِنِينَ عَلَى مَا أَنْتُمْ عَلَيْهِ حَتَّى يَمِيزَ الْخَبِيثَ مِنَ الطَّيِّبِ وَمَا كَانَ اللَّهُ لِيُطْلِعَكُمْ عَلَى الْغَيْبِ وَلَٰكِنَّ اللَّهَ يَجْتَبِىٰ مِنْ رُّسُلِهِ مَن يَشَاءُ ۖ فَاٰمِنُوْا بِاللّٰهِ وَرُسُلِهِ ۚ وَإِنْ تُؤْمِنُوْا وَتَتَّقُوْا فَلَكُمْ أَجْرٌ عَظِيْمٌ (١٧٩) }

[سُورَةُ آلِ عَمْرَانَ: ١٧٨-١٧٩]

أوعى تفكر الكفار تشوف نفسك ولا حاجة عشان الوضع دلوقتي بدأ فيه نفاق يخش بعد بدر طب الموضوع يتساب كده؟ لازم نميز الخبيث من الطيب طب نميز الخبيث من الطيب له احتمالين له طريقتين :

✓ الطريقة الأولى الإبتلاء

✓ الطريقة الثانية إن أنا أخبركم مين المنافق

وأنا مش هقول لكم وما كان الله ليطلعكم على الغيب يبقى الحل التاني الإبتلاءات شفت الآية ماشية أزاى:

{ مَا كَانَ اللَّهُ لِيَذَرَ الْمُؤْمِنِينَ عَلَى مَا أَنْتُمْ عَلَيْهِ حَتَّى يَمِيزَ الْخَبِيثَ مِنَ الطَّيِّبِ وَمَا كَانَ اللَّهُ لِيُطْلِعَكُمْ عَلَى الْغَيْبِ وَلَٰكِنَّ اللَّهَ يَجْتَبِىٰ مِنْ رُّسُلِهِ مَن يَشَاءُ ۖ فَاٰمِنُوْا بِاللّٰهِ وَرُسُلِهِ ۚ وَإِنْ تُؤْمِنُوْا وَتَتَّقُوْا فَلَكُمْ أَجْرٌ عَظِيْمٌ }

[سُورَةُ آلِ عَمْرَانَ: ١٧٩]

ليه؟ عشان طب الرسول مات من هيقول لك الغيب بعد كده يبقى لازم حاجة تنفع هنا وتنفع بعد موت النبي عليه الصلاة والسلام أيه اللي بيميز الناس؟ الإبتلاء أول ما يحصل الإبتلاء على طول هتعرفوا مين المؤمن ومين المنافق:

{ وَلَٰكِنَّ اللَّهَ يَجْتَبِىٰ مِنْ رُّسُلِهِ مَن يَشَاءُ ۖ فَاٰمِنُوْا بِاللّٰهِ وَرُسُلِهِ ۚ وَإِنْ تُؤْمِنُوْا وَتَتَّقُوْا فَلَكُمْ أَجْرٌ عَظِيْمٌ }

فشوف بقى الحكم الباهرة دي كلها أدبك أنت دلوقتي بتفهم سورة آل عمران كأنك أول مرة تقرأها تمام؟ في كل كلمة أتقالت في آل عمران دلوقتي أنت فاهمها بعد ما ربنا عفا عنهم قال :

{يَا أَيُّهَا الَّذِينَ ءَامَنُوا لَا تَكُونُوا كَالَّذِينَ كَفَرُوا وَقَالُوا لِإِخْوَانِهِمْ إِذَا ضَرَبُوا فِي الْأَرْضِ أَوْ كَانُوا غُرًى لَوْ كَانُوا عِنْدَنَا مَا مَاتُوا وَمَا قُتِلُوا لِيَجْعَلَ اللَّهُ ذَٰلِكَ حَسْرَةً فِي قُلُوبِهِمْ وَاللَّهُ يُحْيِي وَيُمِيتُ وَاللَّهُ بِمَا تَعْمَلُونَ بَصِيرٌ (١٥٦) وَلَئِنْ قُتِلْتُمْ فِي سَبِيلِ اللَّهِ أَوْ مُتُّمْ لَمَغْفِرَةٌ مِّنَ اللَّهِ وَرَحْمَةٌ خَيْرٌ مِّمَّا يَجْمَعُونَ (١٥٧) وَلَئِنْ مُتُّمْ أَوْ قُتِلْتُمْ لَإِلَى اللَّهِ تُحْشَرُونَ (١٥٨) فَبِمَا رَحْمَةٍ مِّنَ اللَّهِ لَئِنْ لَّهُمْ وَلَوْ كُنْتَ فَظًا غَلِيظَ الْقَلْبِ لَانْفَضُّوا مِنْ حَوْلِكَ فَاعْفُ عَنْهُمْ وَاسْتَغْفِرْ لَهُمْ وَشَاوِرْهُمْ فِي الْأَمْرِ فَإِذَا عَزَمْتَ فَتَوَكَّلْ عَلَى اللَّهِ إِنَّ اللَّهَ يُحِبُّ

الْمُتَوَكِّلِينَ (١٥٩) }

[سُورَةُ آلِ عِمْرَانَ: ١٥٦-١٥٩]

يعني تشوف ربنا بيوصي النبي عليه الصلاة والسلام يعني سامحهم

{ فَبِمَا رَحْمَةٍ مِّنَ اللَّهِ لَئِنْ لَّهُمْ وَلَوْ كُنْتَ فَظًا غَلِيظَ الْقَلْبِ لَانْفَضُّوا مِنْ حَوْلِكَ فَاعْفُ عَنْهُمْ وَاسْتَغْفِرْ لَهُمْ وَشَاوِرْهُمْ فِي الْأَمْرِ فَإِذَا عَزَمْتَ فَتَوَكَّلْ عَلَى اللَّهِ إِنَّ اللَّهَ يُحِبُّ الْمُتَوَكِّلِينَ }

ده أيه ده ربنا اللي بيقول له أعف عنهم طب ما هو اللي أتعصى ربنا تاني خد له شاورتهم تاني هم كويسين الله سبحانه الله ربنا اللي شفع عند النبي عليه الصلاة والسلام للمؤمنين بيقول له سامحهم وأعف عنهم تحس إن في حاجة ملفتة في أحد العتاب كان خفيف وفي حاجة غريبة في بدر العتاب كان عنيف بدر لما خدوا الفداء نزل عتاب

{ مَا كَانَ لِنَبِيِّ أَنْ يَكُونَ لَهُ أَسْرَى حَتَّى يُتَّخَنَ فِي الْأَرْضِ تُرِيدُونَ عَرَضَ الدُّنْيَا وَاللَّهُ يُرِيدُ الْآخِرَةَ وَاللَّهُ عَزِيزٌ حَكِيمٌ (٦٧) لَوْ لَا كِتَابٌ مِّنَ اللَّهِ سَبَقَ لَمَسَّكُمْ فِيمَا أَخَذْتُمْ عَذَابٌ عَظِيمٌ (٦٨) فَكُلُوا مِمَّا غَنِمْتُمْ حَلَالًا طَيِّبًا وَاتَّقُوا اللَّهَ إِنَّ اللَّهَ غَفُورٌ رَّحِيمٌ (٦٩) }

[سُورَةُ الْأَنْفَالِ: ٦٧-٦٩]

ما أتقالتش في أحد الله! يعني الخطاب في بدر اللي هو حصل فيه انتصار أشد من خطاب في أحد اللي حصلت فيه الخسائر دي وكأن في رفق المكسور في بدر أنت أيه فلا عشان بس تهدي شوية فكان حصل أول ما نزلت الآيات:

{ يَسْأَلُونَكَ عَنِ الْأَنْفَالِ قُلِ الْأَنْفَالُ لِلَّهِ وَالرَّسُولِ فَأَتَقُوا اللَّهَ وَأَصْلِحُوا ذَاتَ بَيْنِكُمْ وَأَطِيعُوا اللَّهَ وَرَسُولَهُ إِنْ كُنْتُمْ مُؤْمِنِينَ } [سُورَةُ الْأَنْفَالِ: ١]

أنت رايح فين أرجع أظبط الدنيا شوية لكن واحد أنا أصلا مكسور فما متكسرنيش أكثر أنا مقتول لي ناس وخلص أنا أتعلمت وهو طالع متعلم معترف ومش مجادل ولا خلاص أنا واخد الدرس من قبل ما تنزل الآيات أنا خلاص أنا عرفت جت منين فخلص بقي طالما اللي قدامك أتكسر وأعترف وأصلا خلاص هو جاهز مش هيعملها تاني يبقى العتاب يبقى خفيف بقي فأعف عنهم حاجة جميلة آيات مبهرة آيات آل عمران مبهرة بكل المقاييس

{ فَبِمَا رَحْمَةٍ مِّنَ اللَّهِ لِنْتَ لَهُمْ وَلَوْ كُنْتَ فَظًّا غَلِيظَ الْقَلْبِ لَانْفَضُّوا مِنْ حَوْلِكَ فَاعْفُ عَنْهُمْ وَاسْتَغْفِرْ لَهُمْ وَشَاوِرْهُمْ فِي الْأَمْرِ فَإِذَا عَزَمْتَ فَتَوَكَّلْ عَلَى اللَّهِ إِنَّ اللَّهَ يُحِبُّ الْمُتَوَكِّلِينَ (١٥٩) إِنْ يَنْصُرْكُمْ اللَّهُ فَلَا غَالِبَ لَكُمْ وَإِنْ يَخْذُلْكُمْ فَمَنْ ذَا الَّذِي يَنْصُرُكُمْ مِنْ بَعْدِهِ وَعَلَى اللَّهِ فَلْيَتَوَكَّلِ الْمُؤْمِنُونَ (١٦٠) } [سُورَةُ آلِ عِمْرَانَ: ١٥٩-١٦٠]

واستغفر لهم وأرجع تاني شاورهم متبطلش دول كويسين وبعد كده قواعد النصر تمام؟ وبعد كده في حادثة كده حصل إن النبي صلى الله عليه وسلم في يوم منافق أتهم النبي عليه الصلاة والسلام إن هو غل من الغنيمة فنزلت الآيات :

{ وَمَا كَانَ لِنَبِيِّ أَنْ يَعُلَّ وَمَنْ يَعُلَّ يَأْتِ بِمَا غَلَّ يَوْمَ الْقِيَمَةِ ثُمَّ تُوَفَّى كُلُّ نَفْسٍ مَّا كَسَبَتْ وَهُمْ لَا يُظْلَمُونَ } [سُورَةُ آلِ عِمْرَانَ: ١٦١]

دي كانت حادثة تانية يعني فالمهم الشاهد يعني إن دي آيات آل عمران منها مثلا قوله تعالى:

{ إِن يَمَسَّكُمْ قَرْحٌ فَقَدْ مَسَّ الْقَوْمَ قَرْحٌ مِّثْلُهُ وَتِلْكَ الْأَيَّامُ نُدَاوِلُهَا بَيْنَ النَّاسِ وَلِيَعْلَمَ اللَّهُ الَّذِينَ ءَامَنُوا وَيَتَّخِذَ مِنْكُمْ شُهَدَاءَ وَاللَّهُ لَا يُحِبُّ الظَّالِمِينَ }
[سُورَةُ آلِ عِمْرَانَ: ١٤٠]

{ أَوَلَمْآ أَصَابَتْكُمْ مُصِيبَةٌ قَدْ أَصَبْتُمْ مِثْلَيْهَا قُلْتُمْ أَنَّى هَذَا قُلْ هُوَ مِنْ عِنْدِ أَنْفُسِكُمْ إِنَّ اللَّهَ عَلَى كُلِّ شَيْءٍ قَدِيرٌ (١٦٥) وَمَا أَصَابَكُمْ يَوْمَ الْتَقَى الْجَمْعَانِ فَبِإِذْنِ اللَّهِ وَلِيَعْلَمَ الْمُؤْمِنِينَ (١٦٦) وَلِيَعْلَمَ الَّذِينَ نَافَقُوا وَقِيلَ لَهُمْ تَعَالَوْا فَيُكَلِّمُوا فِي سَبِيلِ اللَّهِ أَوْ ادْفَعُوا قَالُوا لَوْ نَعْلَمُ قِتَالًا لَاتَّبَعْنَاكُمْ هُمْ لِلْكَفَرِ يَوْمَئِذٍ أَقْرَبُ مِنْهُمْ لِلْإِيمَانِ يَقُولُونَ بِأَفْوَاهِهِمْ مَا لَيْسَ فِي قُلُوبِهِمْ وَاللَّهُ أَعْلَمُ بِمَا يَكْتُمُونَ (١٦٧) الَّذِينَ قَالُوا لِإِخْوَانِهِمْ وَقَعَدُوا لَوْ أَطَاعُونَا مَا قُتِلُوا قُلْ فَادْرَءُوا عَنْ أَنْفُسِكُمُ الْمَوْتَ إِنْ كُنْتُمْ صَادِقِينَ (١٦٨) وَلَا تَحْسَبَنَّ الَّذِينَ قُتِلُوا فِي سَبِيلِ اللَّهِ أَمْوَاتًا بَلْ أَحْيَاءٌ عِنْدَ رَبِّهِمْ يُرْزَقُونَ (١٦٩) فَرِحِينَ بِمَا ءَاتَاهُمُ اللَّهُ مِنْ فَضْلِهِ وَيَسْتَبْشِرُونَ بِالَّذِينَ لَمْ يَلْحَقُوا بِهِمْ مِنْ خَلْفِهِمْ أَلَّا خَوْفٌ عَلَيْهِمْ وَلَا هُمْ يَحْزَنُونَ (١٧٠) ﴿٥﴾ يَسْتَبْشِرُونَ بِنِعْمَةٍ مِنَ اللَّهِ وَفَضْلٍ وَأَنَّ اللَّهَ لَا يُضِيعُ أَجْرَ الْمُؤْمِنِينَ (١٧١) الَّذِينَ اسْتَجَابُوا لِلَّهِ وَالرَّسُولِ مِنْ بَعْدِ مَا أَصَابَهُمُ الْقَرْحُ لِلَّذِينَ أَحْسَنُوا مِنْهُمْ وَاتَّقُوا أَجْرٌ عَظِيمٌ (١٧٢) }

[سُورَةُ آلِ عِمْرَانَ: ١٦٥-١٧٢]

وهنا أنت فهمت كل تقريبا آيات آل عمران اللي بتتكلم في غزوة أحد ومن أول اللي جاي ده غزوة "حمرأ الأسد"
{ الَّذِينَ اسْتَجَابُوا لِلَّهِ }

شيء ممتع جدًا يعني أنا أتبسطت قوي في بعد غزوة بدر لقيت تعليقات كثير قوي الناس دول أنا أول مرة أفهم سورة الأنفال أول لأن فعلاً القرآن غامض شوية في وصف الأحداث لو أنت مش رابط إن هو مش بيقول لك الحدث هو بيقول لك النتائج بس فأنت لو مش مجمع الحدث نفسه هي اللاعبة بتتكلم في آيه دي بتتكلم في مين؟ دلوقتي وأنت بتسمع الآيات كأنك شايف قصة قدامك مرصوفة لو أنت قاعد قرئت الآيات دي كثير قبل كده بس عمرك ما أتملت معك كده فأنتم طلعتم بفائدة أحنا قلنا في أول درس في السيرة إن من فوائد السيرة فهم القرآن فلا يمكن تفهم كثير جدًا من آيات القرآن الا لما تفهم السيرة
شوف أحنا فهمنا نص آل عمران بس في غزوة أحد من أول :

{ وَإِذْ غَدَوْتَ مِنْ أَهْلِكَ تُبَوِّئُ الْمُؤْمِنِينَ مَقَاعِدَ لِلْقِتَالِ وَاللَّهُ سَمِيعٌ عَلِيمٌ {
[سُورَةُ آلِ عِمْرَانَ: ١٢١]

تقريباً إلى قرب آخر السورة وقفنا أهو عند آية هنفهمها دلوقتي

{ الَّذِينَ اسْتَجَابُوا لِلَّهِ وَالرَّسُولِ مِنْ بَعْدِ مَا أَصَابَهُمُ الْقَرْحُ لِلَّذِينَ أَحْسَنُوا
مِنْهُمْ وَاتَّقُوا أَجْرَ عَظِيمٍ {
[سُورَةُ آلِ عِمْرَانَ: ١٧٢]

دي ما بنفهمهاش عمرك ما تفهمها من غير من غير السيرة هتفهمها أزاى لوحدك
دي؟! الذين قال لهم الناس إن الناس ميين الناس اللي قالوا كده أحنا مش فاهمين
حاجة هنا بقى تيجي حمراء الأسد

أيه حمراء الأسد دي ؟

وأيه حمراء دي؟ ده لون ده ولا أيه؟

فاهم أنت مش فاهم أي حاجة فأنا واحدة واحدة حصل بقى حدث حاجة عجيبة بقى
حصلت بعد النبي عليه الصلاة والسلام يوم كم؟

يوم السبت سبعة شوال راجع المدينة ودخلها خلاص وخلص الكلام **أبا سفيان**
مشي من زمان مشي راح رجع بقى مكة خلاص يوم ثمانية النبي عليه الصلاة
والسلام أصبح في يوم ثمانية طبعاً الصحابة كلهم مقلقين أبا سفيان يرجع وكله
مش مديين الأمان فكانوا بايتين في المدينة بيحرسوها وبيحرسوا النبي عليه
الصلاة والسلام بيحرسوا مداخل ومخارج المدينة وعاملين حالة فظيعة فعلاً النبي
عليه الصلاة والسلام فكر قال أنا هستنى لما يقول وكان فعلاً عنده غلبة ظن إن أبا
سفيان ما هو معلش أبو سفيان من أنا فاهمه ما الدماغ عارفينها أبو سفيان مش
سهل مش هيعديها في نص السكة كده أول ما يحسوا أنهم خدوا أنفسهم يقول لك أما
نرجع تاني أحنا عملنا في نفسنا كده ليه؟ طب ما الدنيا سهلة هنخش المدينة بقى
خلاص ونخلص الدنيا دي لأن أحنا كده المعركة مفتوحة أنا قلت لكم معركة أحد
دي عاملة زي المعركة المفتوحة اللي هي مخلصتش لا ده خلصها ولا ده خلصها
لأن المعركة بتخلص بواحد بيجهز على الثاني بياخد غنائم بياخذ أسرى بيقتل
تلات أيام في أرض المعركة زي عادة العرب بيجهز مفيش حاجة حصلت يعني

كل واحد ده خد جولة وده خد جولة والأثنين مشيوا الأثنين مشيوا لا ده كمل ولا ده كمل فهي معركة خلصت مفتوحة فاللي هو أبو سفيان مش هيرضى بكده طب **أحنا أزاي كده ما خلصناش حقنا في بدر؟** أحنا عايزين أسرى وعايزين نكمل عليهم طب هنرجع لهم تاني النبي عليه الصلاة والسلام كان عنده غلبة ظن إن ده هيحصل ففقد في المدينة فكر وأنا هستنى لما يجي لي وأنتم عارفين طبعا قاعدة معنا في السيرة كلها النبي عليه الصلاة والسلام مبادر أتعلم كده أتعلم دي مبادر بيحط كل الاحتمالات وبيفترض أسوأ الظروف ويشغل عليها وده مش تشاؤم ده حسابات عشان كده البعض يقول لك تشاءم حتى تتفائل يعني أيه؟

حط أسوأ الاحتمالات وحط حل له حيث حصل أنا ما تبقاش يعني متفائل قوي إن الدنيا كلها تبقى حلوة الظروف ما تضمنهاش فالنبي حط أصعب احتمال إن أبا سفيان راجع وهيش جوة المدينة مش هيدينا كمان إنذار طب أنا هستنى لما يخش جوة المدينة؟ لا دي مش طباع النبي عليه الصلاة والسلام النبي عليه الصلاة والسلام يوم ثمانية تاني يوم أنت متخيل أنت راجع من غزوة مش راجع من كورة مش راجع من رحلة أنت ممكن ترجع من رحلة تقعد نايم في البيت أيام وليالي ترجع من ماتش كورة بتبقي مش قادر تنزل تاني يوم ترجع من الجيم مش قادر تتحرك بقول لك راجع من غزوة أحد اللي حصل لهم فيها إصابات أنا عايزك تتخيل النبي عامل أزاي أصلا النبي نفسه عليه الصلاة والسلام لوحده أولا مش قادر يحرك كتفه اليمين أصلا خالص بيقول لك هو أتعالج في شهر تخيل كتفه تاني يوم عامل أزاي؟

إذا كان كتفه أتعالج في شهر أmaal كتفه اليمين اللي هو معتمد عليه تاني يوم عامل أزاي؟

وغير إن الجراحات في وجهه باينة جدًا جدًا طازة جرح لسه في الجبهة ،الوجنتين في السنة لسه مكسورة الألم رهيب أنت متخيل يعني أيه؟ سنة ما كل دي آلام مجموعة في شخص واحد تاني يوم غير بقى الجراحات اللي فيهم كلهم ده كده أmaal طلحة أخباره أيه؟

أنتم ناسيين فيه واحد بعث من الموت المرة اللي فاتت **طلحة بن عبيد الله** ده كان ميت ميت في ولا سبعين إصابة طب أبا طلحة الأنصاري اللي خد السهم في ظهره طب **أبا دجانة** أخباره أيه؟ طب **كعب ابن مالك** الناس متدمرة متدمرة حرفيا بكل معنى كلمة متدمر تيجي لي تاني يوم يروح النبي عليه الصلاة والسلام قال

لهم يلا هنطلع تاني غزوة تاني! تاني يوم! تاني يوم على طول كده يعني مفيش هدنة مفيش مش هيستريح مثلاً!

لأ هو تاني يوم وهنطلع دلوقتي فالنبي عليه الصلاة والسلام قال للصحابه أحنا لازم نتحرك تمام؟ هنتحرك الى مكان يدعى **حمراء الأسد** تمام

حمراء الأسد مكان على بعد حوالي تمن أميال من المدينة تمن أميال من المدينة حمراء الأسد وده لمكان النبي عليه الصلاة والسلام

توقع أن **أبا سفيان** حسب حساباته لو هو أنتقل من مدينة أو بعد هو أبا سفيان دلوقتي فين أبا سفيان دلوقتي على بعد حوالي ستة وثلاثين ميل من المدينة ستة وثلاثين ميل من المدينة والنبي عليه الصلاة والسلام حسب حساباته لو هو راجع وأنا أتحركت **هنتقابل في مكان اسمه أيه؟ حمراء الأسد** .

حمراء الأسد ده مكان هو اسمه كده **عشان** كده الغزوة اسمها **حمراء الأسد** وبالتالي النبي عليه الصلاة والسلام قال للصحابه تاني يوم هنتحرك طيب رد فعل الصحابة أيه؟

تمام مفيش أي حد أعترض ولا تردد ولا جادل ولا قال أزاى ولا مش ممكن يا جماعة نطلع اسحاق على الوضع اللي أحنا فيه ده أحنا محطمين حرفياً وبالتالي نزل الثناء عليهم

{ الَّذِينَ اسْتَجَابُوا لِلَّهِ وَالرَّسُولِ مِنْ بَعْدِ مَا أَصَابَهُمُ الْقَرْحُ لِلَّذِينَ أَحْسَنُوا مِنْهُمْ وَاتَّقُوا أَجْرٌ عَظِيمٌ } [سُورَةُ آلِ عِمْرَانَ: ١٧٢]

تاني يوم النبي عليه الصلاة والسلام قال للصحابه إن أحنا نتحرك ناحية **حمراء الأسد**

بس أشرت شرط ألا يخرج معنا إلا من شهد القتال قال محدش هيطلع معنا إلا اللي أصلاً كان معنا في غزوة أحد **عبدالله بن أبي بن سلول** قال له أطلع معك طبعاً قال له مفيش أنسى مش هتطلع معنا جابر ابن عبدالله ابن حرام أنتم عارفين عبدالله بن حرام؟ طالع في غزوة بدر وأمر جابر إن هو يفضل **عشان** في بنات فجابر ما راحش وراح عبدالله بن حرام ومات في الغزوة فجابر طلب من النبي عليه الصلاة والسلام إن هو يطلع معهم قال له أنت عارف إن أنا ما طلعتش بسبب أبويا هو اللي قال لي كده وأنا كنت هطلع من اللي هطلع معكم فأذن لي يعني ما أحب أن

أتخلف عنك في أي مشهد فأذن النبي عليه الصلاة والسلام لجابر ابن عبد الله بس إن هو اللي يطلع معهم تمام؟

فخرج النبي عليه الصلاة والسلام بكل الناس اللي كانوا في غزوة أحد كلهم طلّعوا بلا استثناء وزاد عليهم جابر بن عبد الله بس الحقيقة موقف رهيب الإنسان بيشوف الصحابة بيحس كم نحن تافهون وكم نحن سذج عندما نصنع قدوات وننبره بحاجات هي إذا قورنت بأفعال الصحابة هي تفاهات

اللاشيء يعني مثلاً تلاقي الشباب دلوقتي مثلاً في مأساة كده عندنا إن أحنا مديين الرياضة أكبر من حجمها بكثير قوي صار كل المعاني الضخمة بتتخط على الرياضة بس حتى الفيديوهات بتاعة مثلاً التحفيز تلاقيها كلها رياضة أصلاً يجيب لك ناس في جيم ناس يجروا اه أبطال مفيش أي مجال ثاني عندهم في أي حاجة مفيدة إلا الرياضة هو طبعاً الرياضة نصها ألعاب حرام والربع وربعها ألعاب فيها عورات هيصفصف لك على حاجة أصلاً محدودة وموضوع المسابقات فيه مشاكل زي ما أتكلّمنا فيه قبل كده سيبك كل ده العجيب بقى إن أنت بتفخم قوي حاجة تافهة جداً في رياضة ما ونقعد مثلاً أيام وليالي سنين نقعد نضخم البطولة دي أدبك مثلاً مشهور جداً قفزة رونالدو مثلاً أطول واحد قفز عشان يجيب كومبل هيد معروف يعني القفزة دي مشهورة جداً تمام تخيل أنت مثلاً نقعد أحنا سنين في إن رونالدو أعلى قفزة حصلت في التاريخ ويجيبوها ويعيدوها ونعيد ونزيد فيها وبتاع طب بالنسبة لقفزة الزبير ابن العوام على الجمل في أول غزوة أحد دي كانت أيه نظامها؟ إن واحد نط على جمل مش نط يجيب كرة ده نط جاب كبش الكتبية بتاع المشركين

طلحة ابن أبي طلحة العبدري نط وهو على رجله نط فوق جمل واقف وجاب أقوى مشرك ونزل به مدبوح دي يتحسب أيه؟

أنت مش شايف دي ليه؟ شايف واحد نط جاب كورة بدماعه اللي هو الموضوع ملوش أي لازمة ممكن إن أحنا نقعد أيام وليالي نمجد في لعبية أو في فريق أو في لاعب يقول لك دخل الملعب وكان مصاب أمبارح وبتاع ونزل ورغم إن هو وقع أصر أنه يكمل الماتش وقال للكابتين ما تطلعنش وبتاع وعيط وشوية وكمل الماتش ونقعد بقى مثلاً سنين بقى اللاعب ده عظيم جداً عشان كمل الماتش رغم الإصابة الماتش ده رغم الإصابة تمام؟

وبالنسبة للناس اللي أصابهم القرح أنا بقول لك ده راجع من غزوة في واحد فيه سبعين إصابة سبعين إصابة مش وتر اللي واجعه شوية حضرتك ده متقطع جسمه متقطع شرايح جسمه متقطع من كل إتجاه أزاي ثاني يوم نزل الغزوة؟!

عشان تعرف أحنا قد أيه احنا في تفاهة هنشوف النماذج دي ايه اللي بيعمله الرياضيين أنت عندك رياضي بيقد مثلا سنين عشر سنين يتدرج عشان يعمل خمس دقائق عشان يعمل بطولة في خمس دقائق أو ممكن دقيقة يقفز قفزة بس قفزة يعني يرمي سهم واحد هيرميه تمام هيضرب ضربة هينشن نشانه طب بالنسبة اللي بيحصل في الغزوات ده اللي هو أصلا ده العادي يعني فيه ستمائة ضربة على ستمائة رمية على على على كل واحدة من دول بطولة كاس عالم لوحدها تمام؟

فالشاهد يعني إن الإنسان بيستغرب إن أحنا في معزل عن كل القدوات دي وكل النماذج المبهرة دي قصاد النماذج الهايفة والتافهة والكلام ده يعني دي خاطرة كده عشان الواحد بيتألم من كثرة متابعة الأحداث دي وبطولات بقى وكؤوس وأولمبيات وبتاع والناس تقعد تلف وتدور حوالين حاجة يعني ما لها أي قيمة الصراحة أما تشوف بقى بطولات الصحابة الكرام رضي الله عنهم وأرضاهم تعرف يعني ايه معنى البطولة يعني أيه ثاني يوم تطلعوا غزوة وربنا يثني عليهم نفسه يقول ويقر إن هم فعلاً تعبانين جداً

{ الَّذِينَ اسْتَجَابُوا لِلَّهِ وَالرَّسُولِ مِنْ بَعْدِ } أيه؟ من بعد ما أصابهم الأيه؟ قرح الألم الشديد { لِلَّذِينَ أَحْسَنُوا مِنْهُمْ وَاتَّقُوا أَجْرٌ عَظِيمٌ }

طيب خلينا نكمل عشان نعرف معنى الآية الثانية الذين قال لهم الناس دي معناها أيه؟ اللي حصل بعد كده إن الصحابة رضي الله عنهم وأرضاهم إن هو هم النبي عليه الصلاة والسلام هيروح خلاص حمراء الأسد تمام؟ وهو رايح في الطريق لقي رجل يدعى **معبد ابن أبي معبد الخزاعي** معبد ابن أبي معبد الخزاعي خزاعي يعني من خزاعة أنتم عارفين خزاعة لهم علاقة ببني هاشم جامدة فاكرين المحاضرة الثالثة؟ قلت لكم قبل كده المحاضرة الثالثة دي أهم محاضرة في السيرة هتيجي في أحداث كتير مش هتعرف أيه اللي بيحصل ويقول لك خزاعة دائما ناصحة لبني هاشم دايمًا مع بني هاشم ليه؟

هقول لك بسرعة ليه فهمت ما فهمتش أرجع للمحاضرة الثالثة فاكرين هاشم مات هاشم كان أتجوز سلمى اللي في المدينة اللي هي من بني النجار مخلف شيبه اللي هو عبدالمطلب أتسمى بعد كده عبدالمطلب هاشم أخوه المطلب المطلب بعد موت هاشم راح المدينة وخذ شيبه وعشان كده الناس أفتكروه عبد المطلب فاتسمى عبدالمطلب من ساعتها فكان بيرعاه المطلب كان مهتم قوي بعبد المطلب اللي هو جد النبي عليه الصلاة والسلام **محمد ابن عبدالله ابن عبد المطلب** فده جده تمام؟ ابن هاشم ابن عبد فلما المطلب مات عبدالمطلب عمه الثاني اسمه نوفل في عم اسمه نوفل سرق أملاكه أعتدى على أملاكه عمه اللي هو أخو المطلب فعبد المطلب راح جاب قرايبه من بني النجار ورجعوا له حقه فمن يوم ما حصل شقاق نوفل وعبد شمس هم دول أخوات نوفل وعبد شمس أيه؟ أخوات وبنو هاشم وبنو المطلب دول تحالفوا ودول تحالفوا **أيه علاقة خزاعة الموضوع بقى ؟**

خزاعة عبد مناف اللي هو أبا هاشم ، هاشم ابن عبد مناف عبد مناف ده مراته من خزاعة فتعتبر جدة النبي عليه الصلاة والسلام هم لما شافوا بنو النجار هم بنو النجار نصروا عبدالمطلب **ليه؟** لأن هو أمه من بني النجار اللي هي برضوا جدًا للنبي عليه الصلاة والسلام هاشم أبوه اللي هو عبد مناف مراته من خزاعة فلما شافت خزاعة إن بني النجار نصروا بني هاشم قالوا طب ما أحنا عندنا واحدة تبعهم فأحنا برضوا هنظل ناصرين لهم دائماً فصارت خزاعة بسبب القرابة دي إن مرات عبد مناف اللي هي جدة النبي عليه الصلاة والسلام من خزاعة اعتبروا إن ده ابننا وده له حماية دايما معنا عشان كده يقول لك خزاعة كانت ناصحة دايما لبني هاشم ودايما مع النبي عليه الصلاة والسلام مؤمن وكافر دايما معه وده هيفرق معنا أفكره في فتح مكة لأن خزاعة هتتحالف مع النبي عليه الصلاة والسلام في صلح الحديبية وقريش هتتحالف مع بني بكر إن يحصل هدنة عشر سنين **مين اللي هيغدر في الهدنة؟**

بني بكر هيغدر على خزاعة فراح النبي صلى الله عليه وسلم فتح مكة خلصت المهم يعني فهمت حاجة؟

فبحاول أسهل لكم الموضوع بس هي المحاضرة الثالثة خطيرة ومهمة جدًا خزاعة بقى **معبد أبي معبد الخزاعي** هو أصلاً في خلاف بين بتوع السير هل هو كان مسلم ساعتها ولا لا؟

في اللحظة دي إن أحنا قلنا هم ناصحين للنبي عليه الصلاة والسلام مسلمهم وكافرهم بس يقال إن هو كان مسلم ساعتها فالمهم راح للنبي عليه الصلاة والسلام وقابله في السكة وهو رايح **لحمراء الأسد** قال يا محمد والله لقد عز علينا ما أصابك في أصحابك ولوددنا أن الله عافاك يعني يقول لي أنا لا أتمنى تخش معركة ثانية قال لها طب خلاص يعني زي ما بقول كده أيدي على كتفك لو تقدر تعمل حاجة أعملها أنا برضوا ما أتمناش أحنا الصراحة طالعين مش عايز أقول لك أحنا يعني أيه مش قادرين فعلاً بس هنعمل أيه؟

هنستناه لما يجي لنا قالوا أيدي على كتفك تقدر تعمل حاجة أعملها قال له طب سيب لي بقى الموضوع **معبد ابن أبي معبد الخزاي** هيخلص **حمراء الأسد** لوحده راح معبد وأتجه ناحية المسيرة اللي متوقع إن أبا سفيان هيجي منها أبا سفيان كان جاي من على بعد ستة وتلاتين ميل من المدينة وراجع بقى على المدينة هو عرف هيجي من أي سكة يعني؟

فعمل نفسه كأنه قابله صدفة كده دخل وكان بيلعب على إن أبا سفيان ميعرفش إن هو أسلم طبعا أبا سفيان بالنسبة له ده كنز واحد جاي من ناحية المدينة فهيعرف منه الأخبار فيقول له أي حاجة شاف أي حاجة في السكة فلما قابله بقى أهلا وبتاع وعمل نفسه مش تبع فسابه يجرجره في الكلام وكان هو عارف ان هو هيسأله قال ما ورائك يا معبد؟ قال له أيه الأخبار؟ شفت أيه في السكة وأنت جاي؟ فقال معبد عمل عليه حرب أيه حرب عنيفة حرب نفسية على أبو سفيان تخيل أنت أزاى هتأثر على أبا سفيان نفسيا؟ تخيل كاريزما النبي آدم اللي يقدر يآثر على أبي سفيان نفسيا ده عامل أزاى؟ معبد

معبد ده مش طبيعي تخيل قدر يهز أبي سفيان نفسيا وسفيان الجبل ده عرف يتحكم بقول لك الثبات الإنفعالي ده دروس في الثبات الإنفعالي هو أزاى قدر شف هيعمل فيه أيه؟

كلمتين بالظبط قالهم خلى أبا سفيان يرجع رجعه و رجع الجيش كله لوحده قال ما ورائك يا معبد؟ فقال معبد قال رأيت محمد خرج في أصحابه في جمع لم أرى مثله قط يتحرقون عليكم تحرقا وقد أجمع معه من كان تخلف معه في يومكم وندموا على ما ضيعوا وفيهم من الحنق عليكم ما لم أرى مثله أبداً خد بالك هو ما قالش حاجة غلط ما كتبش ولا كدبة ولا كدبة اولا يقول له انا شفت محمد خرج في أصحابه في جمع لم أرى مثله قط هو في حد زي الصحابة؟

بس كده هو يقصد الكيف مش الكم يقول ما شفتش ناس كده هو مفيش ناس كده هو في حد زي الصحابة؟ أحسن ناس بس مش أكثر ناس هو قال أو يقصد الكيف هو فاهم الكم لم أرى مثله قط وقد خرج معه من كان تخلف عنه جابر حلو ينفع تمشي ما كدبش؟ قال له ده طالع معه ناس ما اللي ما طلغوش معه المرة اللي فاتت ما هو جابر بس مفيش أي حد غير مفيش وبس هو قال له بقى بص محروقين وعايزين يقطعوك وبتاع ودي دي صح أكيد دي مفيهاش مشكلة فأبا سفيان قلع أتوتر قال لا ده عادي يتخيل بقى آلاف طالعة بقى ده اللي ما جوش جم وبتاع والناس و جمع رهيب قال ويحك ما تقول؟

لسه هو بقى بص معبد رهيب في حنة مش عايز أدري له هيفكر لسه بيقول له ويحك ما تقول راح معبد نزل بالتقيلة بقى شوف الذكاء التأثير على الأعصاب قال ويحك ما تقول قال يا أبا سفيان ما أرى أنك ترتحل حتى ترى نواصب الخيل وحتى يطلع أول الجيش من خلف هذه الأكمة قال يا معبد لقد أجمعنا على أن نقاتلهم ونستأصل شأفتهم قال إني لك ناصح والسلام وسابوا دماغه سايحة عارف أيه؟ وبيضرب ضربات سريعة أولا ده كلمتين بعد كده لسه بيقول له ويحك لقيه بيقول له خليك زي ما قال لي ماشي على راحتك على راحتك خليك وخليك زي ما أنت براحتك على ما تتكلم هيكونوا جم سلام طب قل لي أي حاجة طب أحنا نوينا سلاما سلام عارف وتره خلاه يتشتت في التفكير لسة هيفكر لسه هيحسبها أنا لو أدبتك فرصة تفكر هتاخذ قرار أنا عايز أضغط عليه أضغط عليه بالكلام عشان ما تلحقش فأولا خوفه بالكلام وبعد كده جه يتكلم قال له بص أحنا أهو بنتكلم خلاص على الآخر على ما تتكلم هيكون وصلوا طب بس أنا خدت قرار وشكلي وبتاع خلاص خلاص يا باشا خليك يا سلام وتره أبا سفيان أصلا وتره أصلا هو أصلا الناس كانوا قبل الموضوع ده كان في منهم ناس معتزين على الرجوع زي صفوان ابن أمية صفوان أمية أعترض قال يا جماعة نرجع ليه أحنا خلاص يعني زي ما بنقول كده مش هم أحمدا ربنا على اللي حصل يعني حلو قوي كده أحنا كده راجعين مستورين يعني لسه هنرجع طواف ده رجعنا وأتهدمنا بعد كل ده طب ما خلاص رجعنا حلو كده أبا سفيان بقى أزاى نرجع على الوضع ده؟ لا خدنا غنائم ولا خدنا أسرى وتركناهم كده والعرب تقول علينا أيه؟

فالمهم كلام أبوسفيان مشي ف أصلا انت رايع الناس متوترة خلقة ونصهم مش عايز يرجع فلما كمان كمل عليهم معبد لقي كله بقى حصل ضغط على أبو سفيان

كمان من الجيش نفسه وقرر أبو سفيان القرار إن هو هيرجع ومش هيروح وهو راجع لقي رجل من عبد قيس وهو راجع فحد عشان بس شكله عشان يعمل برضوا حرب دعائية مضادة فقال له قال له أنت رايح المدينة؟ قال له اه قال عايز أوصيك وصية ولو عملتها يوم ما تجي لي مكة هدي لك إبل مليانة زبيب قال له إذا لقيت محمدا تمام فأخبره إنا قد أجمعنا الكرة لنستأصله وإنا في الطريق لكي نهزمه ونهزم أصحابه برضوا مش همشي كده يعني قال له رح قل له أحنا جايين و خوفه عشان برضوا يعني يبقى عملنا برضوا حاجة يعني وفعلاً عمل كده أبا سفيان واضطر إن هو يرجع .

وخلصت الغزوة بواحد يا جماعة بواحد أنت ممكن تغير كثير كلمة بتغير كلمة بتتغير كلمة فيها صدق تغير تمام؟

ممكن تغير الكون يقول لك أنا لوحدني هغير الكون اه في واحد غير الدنيا كلها قلب موازين غزوة هتشوف واحد زيه اسمه **نعيم ابن مسعود** هيجير غزوة الأحزاب بعد كده هتشوف فيه واحد بيعمل محمد ابن مسلمة خلص يعني واحد دايم في واحد بيعمل حاجة كبيرة قوي أنت مش قليل أنت مش شوية أنت شايف نفسك قليل ليه؟

ممكن تعمل بس دور أيه اللي بتحسنة ده استغل حاجتين واحد أبا سفيان ميعرفش إن أنا أسلمت أثنين عندي كاريزما وعندي دماغ بعرف أتكلم كويس وأعرف اقن أي حاجة بس دي مهاراتي خدم بها الإسلام ما مش طالب علم ولا داعية ولا بتاع بس أنا عندي ميزتين أنا عندي كاريزما حلوة بعرف أتكلم أبا سفيان ميعرفش إن أنا مسلم دي كفاية المهم دلوقتي تفهم الآية الذين قال لهم الناس مين الناس بقي؟ اللي هو الراجل اللي بعته أبا سفيان هو ده الناس اللي مقصودين في السيرة دي الراجل ده اللي هو راجع اللي هو كان من عبد قيس راجع قال للنبي عليه الصلاة والسلام إن الناس مين الناس أبا سفيان أول مرة تفهمها الراجل اللي بعته أبو سفيان قال له رح قل له كده الذين قال لهم الناس اللي هو الراجل اللي بعته أبو سفيان إن الناس دي بقي أيه؟ ابو سفيان واللي معه قد جمعوا لكم فآخشوهم فلما وصل لهم الخبر زادهم إيماناً أيه الناس دي يا عم؟

{ الَّذِينَ قَالَ لَهُمُ النَّاسُ إِنَّ النَّاسَ قَدْ جَمَعُوا لَكُمْ فَاخْشَوْهُمْ فَزَادَهُمْ إِيمَانًا وَقَالُوا حَسْبُنَا اللَّهُ وَنِعْمَ الْوَكِيلُ (١٧٣) فَأَنْقَلَبُوا بِنِعْمَةٍ مِّنَ اللَّهِ وَفَضْلٍ لَّمْ يَمَسَّسْهُمْ سُوءٌ وَاتَّبَعُوا رِضْوَانَ اللَّهِ وَاللَّهُ ذُو فَضْلٍ عَظِيمٍ (١٧٤) إِنَّمَا ذَلِكُمُ الشَّيْطَانُ يُخَوِّفُ أَوْلِيََاءَهُ فَلَا تَخَافُوهُمْ وَخَافُوا مِنِ اللَّهِ إِن كُنْتُمْ مُّؤْمِنِينَ (١٧٥) وَلَا يَحْزُنكَ الَّذِينَ يُسَارِعُونَ فِي الْكُفْرِ إِنَّهُمْ لَن يَضُرُّوهُ إِلَّا شَيْئًا يُرِيدُ اللَّهُ أَلَّا يَجْعَلَ لَهُمْ حِزًّا فِي الْآخِرَةِ وَلَهُمْ عَذَابٌ عَظِيمٌ (١٧٦) إِنَّ الَّذِينَ أَشْرَكُوا الْكُفْرَ بِالْإِيمَانِ لَن يَضُرُّوهُ إِلَّا شَيْئًا وَلَهُمْ عَذَابٌ أَلِيمٌ (١٧٧) وَلَا يَحْسَبَنَّ الَّذِينَ كَفَرُوا أَنَّمَا نُمَلِّى لَهُمْ خَيْرٌ لِّأَنفُسِهِمْ إِنَّمَا نُمَلِّى لَهُمْ لِيَزْدَادُوا إِثْمًا وَلَهُمْ عَذَابٌ مُّهِينٌ (١٧٨) } [سُورَةُ آلِ عِمْرَانَ: ١٧٣-١٧٨]

سبحان الله! فالنبي عليه الصلاة والسلام طبعاً للمبالغة في إن هو يؤكد انتصاره قعد في حمراء الأسد دي الثلاث أيام .

وبكده هو اللي كسب **حمراء الأسد** لأن هو اللي وصل وفعلاً الوحيد اللي وصل الثاني هو مجاش أصلاً وأنا قعدت ثلاث أيام وده من عند العرب أنت كده أتعلم عليه ثلاث أيام قاعد وأنت مجتش مايعني أيه أنت كده ملكش لازمة من شجاعتى قعدت ثلاث أيام في المكان مستنيك أنت مجتش قعد ثلاث أيام عليه الصلاة والسلام هو زي ما قلنا وصل يوم الأحد قعد الأثنين والثلاثاء أربعاء في نفس المكان ثم عاد النبي عليه الصلاة والسلام إلى المدينة وأنتهت هذه الغزوة اه وزي ما يعني أحنا تقريبا استطردنا تماماً في ذكر الفوائد والمصالح وكده شوفنا الغزوة كانت تقريبا متكافئة جولة وجولة ولم تنتهي مفيش حد فيهم حسمها بغنائم ولا بأسارى ولا إن هو أجهز على الفريق الثاني فما نقدرش نعتبرها هزيمة للمسلمين هزيمة بالمعنى العام وإن كان نقدر نقول لقد أنهزم الذين عصوا الله ورسوله دول أنهزموا أما العموم ممكن نقول حصل خسائر في الطرفين **لكن هل حصل هزيمة لأحد الطرفين بالمعنى المعروف للهزيمة؟**

لم تكن هزيمة كاملة الآن من الطرفين ولا نصر كامل لأي من الطرفين . وإنما هي زي ما قلنا تعتبر غزوة نهاية مفتوحة لا لم يمت تصل أحد صانعا حاسما ولم يهزم هزيمة حاسمة والغزوة دي بتعتبر كده حاجة تحطها قدامك في أي ألم من آلام المسلمين فيها كل العبر وكل الفوائد اللي ممكن نعتبرها في أحوال المسلمين طبعاً الموضوع اللي حصل ده ترتب عليه إن المسلمين طبعاً سمعتهم بقت أقل من

بدر وبدأ يتجراً عليهم اللي مكنش يقدر يتجراً عليهم قبل كده وهتحصل أحداث بقي هنشوفها وأحداث بقي صعبة بقي في الفترة دي إن حصل جراءة على المسلمين بعد بالظبط ما خلصت الغزوة دي بدأت بقي أحداث صعبة على المسلمين هتلاقي إن في محرم سنة أربعة من الهجرة عارفين دي شوال يعني خلاص السنة بتخلص أول ما بدأت سنة أربعة حصلت أحداث كتير ضد المسلمين في محرم سنة أربعة من الهجرة حاول بنو أسد إن هم عملوا حق كانوا يهملوا بالإعتداء على المدينة وقتال النبي عليه الصلاة والسلام

ووصل للنبي عليه الصلاة والسلام إن في واحد اسمه **خالد بن سفيان** بيجمع له الجموع في محرم سنة أربعة برضوا من الهجرة في قبائل تبع **بني لحيان** قتلوا عشرة من الصحابة في موقعة مؤلمة اسمها **بعث الرجيع** أقتل بعد كده سبعين من الصحابة في موقعة أليمة اسمها **بئر معونة** برضوا دي هنتكلم عنها المرة القادمة بنوا حاولوا النضير يقتلوا النبي عليه الصلاة والسلام بعد غزوة أحد بنو غطفان في جماد الأول سنة أربعة من الهجرة حاولوا يغزو المدينة تخيل كل الأحداث دي السبب اللي حصل في يوم أحد كله بدأ يتجراً على النبي عليه الصلاة والسلام خيلنا نقول حدثين سريعين في آخر خمس دقائق ونسيبه من أول بئر الرجيع بعثة الرجيع وبئر معونة المرة القادمة حادثة أول حادثة حصلت نتيجة للي حصل في يوم أحد وهي محاولة بنو أسد الإغارة على المدينة وطبعا القاعدة النبي والسلام مبادر ودايما عنده الأخبار استخبارات في كل مكان على طول وصلوا الخبر إن بنو أسد بيحضرُوا لغزوة أو بيحضرُوا للهجوم على المدينة على طول فوراً النبي عليه الصلاة والسلام عمل كتيبة على رأسها أبا سلمة رضي الله عنها وأرضاها كانت فيها مية وخمسين واحد من مقاتلين خد بالك ما هو الناس دي برضوا ما يعني معلىش أبا سلمى طالع من الغزو عامل أزاى؟ أنت رايح يقاتل تاني مفيش شهرين هيبقى قائد على سرية هتصد جيش هيجي المدينة أنت أيه؟ أنت عامل أزاى؟ هتشوف أبو سلمة هيحصل فيه أيه بعد الغزوة اه بعد السرية دي بعثة على مية وخمسين مقاتل كانوا عند بنو أسد أنت لسة هتطلع لي هم وصلوا لهم وطبعا لما هم سمعوا بقدوم جيش المسلمين فروا فروا وباغتهم في ديارهم فتشتتوا وجمع المسلمين الغنائم بكل بساطة وسهولة وعادوا إلى المدينة سالمين غانمين لم يلقوا حرباً ده كان في يوم واحد محرم من سنة أربعة من الهجرة أبا سلمة بعد السرية دي كان عنده جراحات من يوم أحد أنفجرت بعد السرية دي ومات أبا

سلمة أنت متخيل كان طالع أزاى طالع شبه ميت وطالع راجل رجولة عجيبة طالع مليون جراحات جراحات قاتلة بتموت وبكل شجاعة طالعة يقود سرية لدرجة إن هو لما رجع ما أستحملتش بقى يعني بعد كمان الجراحات دي عمل مجهود كبير مات بسبب جراحات أحد بسبب مجهود الضخم اللي عمله في السرية بتاعة بني أسد دي فلم يلبس المال طبعاً النبي عليه الصلاة والسلام يعني أبا سلمة ده أخوه في الرضاعة تخيل بقى ألم النبي عليه الصلاة والسلام أخوه في الرعد تألم جداً على موته عليه الصلاة والسلام ودخل عليه عند موته وهو اللي غمض عينه بيده عليه الصلاة والسلام

و دعا له قال: اللهم أرفع درجته في المهديين وأخلفه في عقبي في الغابرين وأغفر لنا وله يا رب العالمين اللهم أفسح له في قبره ونور له فيه

أم سلمة بعد موت أبي سلمة قالت قلت كما قال النبي عليه الصلاة والسلام اللهم أجرنى في مصيبتى وأخلف لي خيراً منها ثم قلت ومن خير لي من أبي سلمة؟! قالت فتزوجني رسول الله صلى الله عليه وسلم بعد فترة كده النبي عليه الصلاة والسلام طبعاً يعني أم سلمة كان لها عيال كانت وحيدة امرأة وحيدة فيعني وفاء لأبي سلمة فرعى أهل بيته

وتزوج النبي عليه الصلاة والسلام أم سلمة رعاية لها ورعاية لأبنائها فهنئاً لأم سلمة هذا الدعاء وهنيئاً لها الزواج بالنبي عليه الصلاة والسلام .

آخر حادثة معنا النهاردة وهي بعث عبدالله بن أنيس

بعث عبدالله بن أنيس ده كان في نفس الشهر خمسة شوال خمسة شوال النبي عليه الصلاة والسلام جاله أخبار إن خالد بن سفيان خالد بن سفيان منه هذيل برضوا بيحشد لغزو أو لحرب المسلمين النبي عليه الصلاة والسلام عمل المرة دي حل ثاني خالص هو برضوا له دراية بالأحوال يعني ف قرر المرة دي إن هو مش هيطلع سرية ولا حاجة موضوع سفيان أسهل من كده يعني موضوع بنو أسد كان كبير لكن سفيان موضوعه أبسط من كده قال لعبدالله بن أنيس خلصني من الموضوع ده واحد عبدالله بن أنيس قال له خلاص الموضوع ده قال له أعمل أيه؟ قال له أقتله بس تروح أقتل لي خالد بن سفيان ده خالد ده سيد قومه تمام قال له تقتله حاضر تمام قال له أصل أنا عندي مشكلة قال له قال له ما أعرفش شكله قال

له ما أعرفوش فعلاً ما أعرفوش قال له لما تشوفه هتعرفه قال له أزاى يعني هعرفه أزاى؟

قال له رجل سيقشعر بدنك عندما تراه هو أصلاً شكله يخوف أول ما هتشوفوا جسمك هيقشعر قال له يعني فصدق يعني خلاص ده النبي بيقول كده بيقول له خدتها ورحت وراح فعلاً للمكان اللي فيه خالد اللي معروف إن هو بيبقى فيه ناس كتير يعني قال فرأيت رجلاً لما رأيته أقشعر بدني فعرفت أنه يلجأ مش بني آدم بقى أيه واضح إن هو حاجة مخيفة يعني يقول لها شف جسمي قشعر حجمه وشكله وبتاع بيقول بس أنا لما وصلت له لقيته أيه قاعد مع نساءه كان لسه كان في بيته ومع نساؤه فكان الموضوع سهل يعني معندوش حصن بقى زي كعب ابن الأشرف والجو ده العرب مش يهود العرب سهل توصل له يعني فبيقول دخلت عليه برضوا هو ما يعرفنيش ما دي ميزة برضوا هو ميعرفنيش قال من الرجل؟ قال جئتُك وسمعت أنك ستقاتل هذا الرجل الذي في المدينة وجئتُك معك في هذا الأمر

قال له تمام تمام قال له بس عايزين نبقى على إنفراد وبتاع عايز أقول لك كلمتين كده في الموضوع ده الموضوع ده شاغلني وبتاع يلا بنا سرح به شوية وبعد كده راح مطلع السيف وفين يوجعك وقطع خالد ابن سفيان ، اه قطع خالد وبعد كده رجع للنبي عليه الصلاة والسلام قتلت يا رسول الله؟ قال نعم قتلت .

ربنا أوحى إلى النبي عليه الصلاة والسلام إن هو أتقتل فعلاً فقال نعم قتلت ففرح جداً قال له النبي أفلح الوجه يا **عبدالله بن أنيس** يعني ما شاء الله عليك خلصت في ثانية خلص الموضوع بسهولة جداً فالنبي عليه الصلاة والسلام راح أدى له عصاية قال له خذ العصاية دي فاكرين الوفاء مع السيف؟ شف بقى هيعمل أيه مع بني آدم؟ أداله عصايته أدى له عصاية قال له خذ العصاية دي فعبدالله بن أنيس من كتر يعني من كتر الإنقياد للنبي عليه الصلاة والسلام خذ العصاية ومشى .

فالناس قالوا له أيه العصاية دي ؟

قال لهم دي عصاية النبي صلى الله عليه وسلم .

قالوا له أديها لك ليه ؟

قال له معرفش .

قالوا له أنت خدتها كده وخلاص ومشيت؟!!

قال لهم والله نسيت أسأله عطاها ليه ؟

قالوا له طب ما ترجع أسأله أديتهالك ليه؟

قال له أصل أنا بقى بسمع الكلام وخلاص .

فرجع قال له يا رسول الله لما أعطيتني العصا ؟

قال لتكون علامة بيني وبينك يوم القيامة .

عشان يوم القيامة أعرفك عايز أعرفك يوم القيامة لما تلاقي واحد ماسك عصاية يا جماعة يوم القيامة ده عبدالله بن أنيس ده الوحيد اللي هيجي يوم القيامة معاه عصاية كده ماشي بها لوحده منورة كده قال له عايز أعمل لك علامة مميزة مهمة كل الموقف يعرف مين عبدالله ابن أنيس عشان أنت عملت معي الصراحة واجب يعني قتل خالد خلص بدون سرية ولا بتاع واحد وفر علينا مجهود جامد جدًا تستاهل جائزة الصراحة عمل عمل جيش لوحده قال له العصاية دي معك يوم القيامة تقابلني بها وتقول لي أدي العصاية العلامة اللي بيني وبينك يا رسول الله ففرح عبدالله بن أنيس ظل محتفظ بها طول حياته أوصى بنيه أن توضع في كفنه إذا مات .

فعلًا حطوها في الكفن بتاع عبد الله بن أنيس وكفنوه بعد ما مات ودفن مع عصاية النبي عليه الصلاة والسلام .

رجال بكل المقاييس حاجات مبهرة وصفات رائعة جزى الله خيرا أصحاب النبي محمد صلى الله عليه وسلم على ما فعلوا وقدموا كل يوم بنتعلم منهم وكل الأحداث الصراحة مشوقة ورهيبية إن شاء الله نكمل المرة القادمة في أحداث هتكون صعبة شوية «» **حادث بئر الرجيع ومأساة بئر معونة.**

أسأل الله أن يتقبل منا ومنكم صالح الأعمال

السلام عليكم ورحمة الله وبركاته